



木犀集卷之五

五言古二

冷水舖題留主人壁

壁上有方爾止孫
豹人詩因懷之

古人好題詩多在館與驛此意非博名聊以志行役後人
強效之揮毫何狼籍敗名不足羞汗壁良可惜遂使風雅
流相戒罕留蹟雖有復古心亦畏人指擿春雨過江村愛
此牆壁白舉頭見數行宛然愜平昔何況作詩人皆予心
所憚朗吟不能休牆壁生光澤因念兩逸民俱有天涯隔
一歸邗水濱一爲滄峯客豈知逆旅中有人懷此夕詩成
欲留題落筆顏先赤且恐主人嗔書紙黏於壁



宿香爐寺

山徑苦蕭條偕行賴僮僕遙望崇山巔深林覆華屋傳是
香爐寺今宵堪止宿入戶聞無人松風正謾謾殿上香不
然廚中火不燠遶廊叩禪房老僧睡方熟披衣起致詞懽
然進茗粥最晚一僧歸負米不盈斛云自城中來聽得南
宮錄計偕十二人十人抱璞哭我聞重訊問真僞恐未卜
不知十人中幾人好奇服誰當感慨深誰當抱慚慙念我
二三友將無淚淋漓客子方欷歔老僧已閉目不問亦不
言陶然遊天竺

西鄉飲戴若潞宅

昏黑投蘭若腹饑力已倦此方有舊知戴子實邦彥忽聞
讀書聲乃在觀音殿問僧知姓名果是吾家倩呼童先致
詞聞言心已眷疾遣大兒歸報母速設饌此爲汝舅氏經
年罕識面要我出禪扉攜手周芳甸乃登君子堂門庭皆
改變樹下繫黃牛梁間巢紫燕斗酒出牀頭流霞光片片
腊醢旋成行羅列皆珍膳喜君五男兒南金復東箭大郎
能文章年少開萬卷去年完婚姻禮儀從簡便肥豨雖未
速今來盡懽宴二郎與三郎皆能侍筆硯次第起行觴岐
嶷良可羨更攜第四兒見客目頻眴立久遂成眠猶持阿
翁扇別來曾幾年蘭玉堦前徧所媿爲人舅欲似無一善

五郎復如何索乳方留戀明朝別姊歸應抱五郎見

有假予白詩未還者索得之喜成三十韻

昔愛香山詩手錄成一編一從借人去羈留遂半年今朝
忽有思呼童始索還如與良友別歡然接容顏又如佳山
水久隔倏躋攀開卷吟復吟此樂何可諼因思世俗人所
好匪一端或好趨權勢竭力附腥羶或好營封殖多藏買
宅田或好擣博戲百萬擲金錢又或好豔冶珠翠媚嬋娟
又或好制義僥倖得一官又或好釋老逃禪與求仙所好
雖各殊靡不精且專而我獨淡漠諸好無一焉自問有何
好厥好在詩篇復問好何詩姓白字樂天所以數年來時

時與周旋讀其諷諭詩可以勵薄頑讀其感傷詩可以助
悲酸讀其閒適詩可以釋憂患格律及歌行亦復有餘妍
昔在長慶時寥寥劉與元焉知千載後尚有人流傳迴思
初買日讀之忘寢餐奈何作輟多在好不好間致使世俗
人謂予志弗堅反不如諸好輳結有深緣願自今以後與
君有成言誓將持此集一日一回看

梁園冬至夜同萬巖南明府坐一無上人禪室限雪

字

峩峩嵩少雲皎皎梁園雪悅此景物佳窮冬脂車轍上人
東南秀瓢笠何孤孑延我坐禪牀圖書紛羅列仙令復同

來共語無生訣因念時序遷天涯此令節起戶視霜簷已
見寒冰結向夜炙山薪晚菊芳彌冽有酒斟酌之似爲吾
輩設茗香與酒芬道味究何別坐久將還房殘燈猶未滅
預恐不成眠布衾冷如鐵

抵夏邑陳簡菴見訪卽邀過古靜堂同關海臣令兄

玄舉夜集

下馬投荒祠颯颯風霜寒豈不念伊人亭午方朝餐咫尺
尚天涯寸心難自安何意高軒過抵膝相盤桓邀我登華
堂爲我進辛盤同心二三友清言激文瀾主客各真率相
期及夜闌洗爵出賢嗣矯矯芝與蘭語默皆中度佩服無

綺紈義方雖有訓童穉良獨難哲人昌厥後天道詎無端
伊予忝世好一見增古懽傾倒遂無數不知露華溥匪君

敦素交旅思何由寬

時令嗣去幅義思
在座皆嫺觴政

訪陳簡菴谿南草堂

晴旭照高林小牕起微曙風煖鵲聲喧散步出城去霜林
積翠中是君讀書處拏舟渡前谿入門尚微覷觀君靜者
心愴與聖賢語竹木有舊行琴書無雜助山厨餘豆芹懽
然進七箸話久汲寒泉烹茗澄心慮淹留方未央落日一
何遽

寄內

嗟予鮮兄弟顧影惜孤子每當歲暮時百務紛糾結憶昨
辭家園母病情悲咽再拜前致詞歸及迎春節豈料游子
裝數爲人羈繼歲晏遽難還望雲心淒絕行年三十餘未
作經年別所恃惟健婦問省慎無輟辛盤自爾供椒酒代
予設抱孫繞膝前時取慈親悅王母尤衰羸春秋已望耄
慰寧匪一言停勻視飲啜祀竈與祀先粢醴必芳潔上塚
命大男步隨長者列小男乳臭兒旦晚調寒熱暇時迎兩
女歸寧應益切凡事存矜慎切勿蹈予轍書罷寄此章遠
懷難具說

觀夏邑縣迎春作

客行黍丘市歡呼聞點春借問此何爲迎春及芳辰赫赫
令與尉先期凡幾申四門并四關旗亭各鮮新牧童負其
餽稻女塗朱唇傍搜諸村落春妓得數人打鼓過琴堂迴
繞五六巡諸具有弗備恐遭令尉嗔今茲東郊役儀仗紛
羅陳樓上誰家女朱簾錯文茵村婦插花枝挈伴塞城闌
過橋人愈稠官道揚灰塵奈何防寇盜三門皆填堙惟餘
城東門來往倍僦僦爲樂復懷憂嗟此黍丘民勸爾勿憂
嗟長令賢且仁

賦得綿綿思遠道

北風何烈烈吹我薄羅幃須臾揚塵土白日無光輝忽憶

遠遊客淚落不能揮浮雲西北馳鴻雁東南飛相去萬餘里但有長相思勞勞車馬間顏色倏已非顏色雖易變中心諒不移願言加餐飯慰此渴與飢

四十初度有感

四十今朝是含悲不能言他人強歡慰益增予憂煩人生各有志富貴非所論至憂從中來永念罔極恩皤皤雙白髮溫旨缺晨昏西郊有三喪無計歸丘原父祖早卽世中道失弟昆俛仰三代間孑焉一身存長成已四十不如犬與豚生死兩無藉何以爲子孫

有懷先君子行年甫四十霞觴未及稱薤露嗟何急皇祖暨予弟三十皆不及叔父好神仙亦僅踰而立伊予獨何幸啣杯悲喜集德器遜前人爲善恐不給何況未了事獨力難捃拾至人有大年修短匪可執白髮且星星不能謀炊汲爲防阿母知獨對妻兒泣

田家

越溪入村墟斜日照柴荆繫驢槐樹邊怪無鷄犬迎草屋餘數椽牆垣半已傾野老前致辭有田非不耕季夏苦積澇高原水泉清且恐室廬盡安問秫與稭主人幸來止含悽陳此情

民生日云蹙不能謀晨昏雖有水旱災司牧無一言田父

荷鋤歸里正已在門府帖昨夜下令嚴催科繁入門面如
土呼兒謀鷄豚盤餐先後出侍立訴煩冤主人雙淚下客
亦咽復吞回頭語田父舉家且勿喧急輸租稅去兵馬如
雲屯

余振千來山莊信宿數日相與談論甚快因爲詩以
紀之得四十四韻

松山刈早禾逢秋一來視遙望鷹窠傍衡門路猶記豈不
念伊人日落難弭轡室邇人則遐中夜弗成寐晨興飛寸
翰疾遣蒼頭致向午始言歸空題凡鳥字所思不可見咄
咄復何事悶數牛背鴉閒摘隴頭穗故人忽來訪乃自縱

水至聞聲遽倒履入門卽把臂相別曾幾何形容俱憔悴
話久漸移時互哂人情異乾坤何古今爭逐錐刀利桀者
犯衆怒巧者逃清議螳雀雖異情梟鳩故同類世俗好嶮
巇骨肉工行僞京攸且相軋他人更誰懟問訊未及終撫
几各長喟因復相戒勉人生自有志萬年教兒諂吳虞不
能媚寧人嗤我愚毋我美人智田叟懷古歡鷄黍競相餽
有時來見招小隔田間遂更番策跛驢或借鄰家騎每出
讓君先每坐予居次一日一再飲雖飲不至醉向夕掩柴
門坐久取熟睡縱譚身世間頗覺無漏義小奚報醫來遽
欲我遐棄更復強致辭一宿連枕被念予寡弟兄君亦少

昆季山居良自全城市嬰時忌昔逢惡少年凶隙起厓背
屈指數年來十人失三四嗟彼夸毗子譎詠誠何意攘詬
且忍尤修名幸無墜與君一夕言揮我十年淚德怨何足
論窮達亦如寄惟有積善心可以回天地君歸拜若母試
爲述一二白首稱同心仁言勉相遺何必飲君酒必以口
腹累咫尺不登堂予情實滋愧十月霜雪中煖寒拜君賜

早春幽居

春至陽和動萬物各欣欣階草綠已齊簷花紅且紛甫嘆
風日美歛忽屯浮雲閉戶無儕偶因復懷其羣安得偕所
懽昕夕論奇文辛盤雖不供尚有菘與芹糟床新酒熟可
以取微醺酌罷敬春枕夢覺梅花芬陰晴且不問寒暑亦
奚分寄語當塗子富貴安足云

寄孫豹人

山郭雖荒僻宦遊多名賢昔在甲午冬君來更翩翩顧予
嬰時忌一見情懽然贈我以長句投我以華箋同遊二三
子唱和輒連篇君獨追古調不與衆爭妍著屐冰雪中揮
毫歌舞前高文迴頽波雄辯如流泉遂令下里曲皆奏高
山絃君行挂征帆言歸及殘年冷冷揚子水漠漠廣陵烟
所思不可見此意誰能傳

峩峩黃公祠雙栢當窻牖霜雪覆虬枝日貫荆高酒君飲

我作歌我歌君擊缶所嗟烟水隔倏別五年久至今過祠
傍一步一回首黃公豎大節幽光孰能剖君實良史才佳
聯榜堂右此祠既千年此栢亦必壽此聯更闡幽足稱三
不朽爲問天台人還入龍眠否黃公靖南侯得功也
邢江佳麗地紛紛車馬迹聞君靜掩關高咏敵寒汝更操
月日評藻鑑傾詞客客從淮揚來傳君宛疇昔見我梁園
詩讀罷聲嘖嘖洩渤勞見收葑菲誠何益令名人所忌聞
言轉踈踏伊予有慈親苦吟稍成冊柳絮焉敢媿栢舟倘
堪繹願以錫類思再拜推詩伯

龍眠二烈詩

項烈婦潘氏

諱巽進士項紹芳之妻從兄迴瀾之女也

吾宗毓閨秀紉佩紛芷若阿翁性嶮崎與我少同學猶記
生女時不減生男樂汝髮纔覆眉汝翁趨戎幕殷勤臨別
言場我生死託望斷嶺南梅不返遼東霍母女顧相依凶
歲守窮約秉性旣幽貞賦質復柔弱緝洗聊自存饗殮採
藜藿及笄始議婚東鄰饒媒妁蒼黃卜筮中擇壻得項橐
醮詞代阿翁西向酒三酌往哉事夫子禮法稟鍾郝梁鴻
甫出關陸機旋入洛再登計偕車文譽騰秘閣私心欣有
歸九原亦可作翟蕝雖十年服玩仍澹泊謁選入承明反
被微名縛鸞翮方排霄千里投贈繳凶問自北來鄰里咸

驚愕憔悴深閨夜泣斷寒城析絕食已三旬母在姑伴諾
既念結髮恩此意安可薄雙鬟不及知慈母亦弗度衰經
拜靈前從容歸冥冥病骨塵支牀就義胡踴躍持此報所
天中心庶無怍曄曄寶婺星白日嗟隕落平生篋笥藏一
任豺虎攫猶能感侍婢奮激委溝壑悠悠春杵人哭聲振
西郭

江烈婦夏氏

諱誥諸生江迥之妻
夏少府統春之女也

龍眠有夏氏往往多偉人子效爲孝子元夫爲忠臣孺人
忠臣女賦性本清淳幼秉保姆訓壺範知所遵視聽罔陝
輸修潔及椁榛十七始于歸舉案叶良辰操作井臼間電

勉忘其貧淑問播媼黨仁風被四鄰吾弟與江子連袂託
情親熟諳少君賢福履必駢臻秋飈起鵬鷲江子充國賓
花筆未及揮零落秦淮濱孺人聞凶耗憤激不顧身口呼
江子字頭觸楹間振四肢爲之殫兩日爲之瞋握透平原
爪嚼穿睢陽齧淚盡繼以血膚裂無完唇展轉牀蓐間絕
粒遂經旬一朝靈輻至驚起如有神再拜謝夫子浩氣橫
秋旻剔目與斷臂區區安足論吾弟既不祿厥婦亦貞純
守死二十載植節如松筠矚然稱雙璧難分玉與珉江子
吾夙好膠漆比雷陳中路惑讒言懷疑生怨嗔因婦敬其
夫刑于良有因大節炳千古疇能沒其真

喜霽

春朝睡起遲竹窻曉猶閉好鳥鳴復鳴始知天欲霽披衣
負牆暄新綠平階砌積陰酒興慵新晴詩思銳何當雨暘
時薄田逢樂歲下以償逋責上以輸租稅

苦雨行

積陰已彌月晨起登層閣投子無曉鐘春雨連城郭浮雲
一何頑北風一何虐霜雪每交乘雷電相噴薄豈無朝曦
升偶噪簷邊鵲曝禪趁新晴晌午又如昨敝廬耐寒冬那
堪春雨惡牆敲漸欲傾門爛倩誰縛吾輩猶閒居窮氓安
所託不聞數日中米價頓恢廓更憐風雨夜赤脚傳寒析
山田節候遲三月乃東作秧水須及時更與春雨約

夢得倪南蔭粵中書

蕭蕭夜雨長耿耿不能寐依依夢覺中肅肅霜鴻至山川
阻且修寄言良不易開械見素書猶漬思家淚書中何所
言反復藏深義下有長生丸上有俠骨字嗟予非其人讀
罷徒滋媿故人官羊城剖竹擁千騎俠骨本嶙峋寧辭口
腹累往歲宋遊時互嗤人情異君復好遠遊茲遊願已遂
慈母方倚閭寂寞斑衣戲願言早旋歸共付書中意

還山詩爲何省齋太史賦

長安盛冠蓋車馬何驥軒苟得登仕籍誰復丘壑情達哉

何學士翛然遺世榮年少掇巍科攜家宦神京初爲侍從
臣經術擅承明往往因論事至尊鑒其誠及應南宮聘得
士冠羣英所以十年內勳階累崢嶸不知誰所爲一旦呈
官評宸眷雖鼎盛臣職當歸畊拂衣尋故山松竹猶菁菁
鸞翮凌層霄恥與鷄鶩爭遙遙賀知章千載媿令名

君年甫踰壯角巾便歸第茅盈山色佳弘景松風脆豈惟
君壯年宦情應更銳君家堂上翁未及懸車歲剖符章貢
間治聲騰燕薊聞君賦歸來亦鼓秦淮柁置身榮利外冷
眼升沈際萬石曷足稱二疏洵堪繼嗟彼輦上人白頭無
休勢自矜羽翼多宦海牢根柢一朝冰山頽回首思崔嵬
勿謂還山愚還山庸非計

雨中聞綏人同元白古愚游西山却寄

攘攘塵囂中多被利名誤雖當晴霽日芳郊罕一顧間有
登臨人半爲親與故誰肯風雨中著屐縱閒步之子秉幽
尚丘壑有奇趣夙懷箕穎儔兼饒濟勝具四月梅雨惡積
陰連朝暮雨歇便衝泥西山晚猶霧言念漱石亭流泉足
瀑布攜我二三友草際覓微路柴門帶雨開酒榼逢花駐
山僧復幾人新筍應無數嗟予雖踈慵杖履猶堪附兀坐
斗室間聞風能無妬

先王母見背方繡山民部王暉文學博各寓書枉唁

兼惠賻儀賦謝

鄰喪春不相大禮垂訓辭匍匐救有喪谷風載歌詩生長
同鄉曲弔賻有常儀矧在大母行節孝兼壽耆伊予罹凶
閔中心憐以悲上感賢明宰洎我慈惠師誅詞揚彤史酒
漿羅寢帷親故暨族黨赴弔皆及期哀輓與酌奠一一有
隆施豈無二三輩生芻曾莫遺亦有輕薄子訃聞若罔知
彼哉何足較適自形衰瀉廣文英山麓民部秦淮涯雖有
死喪威無由寄所思顧念杵臼義慰問各孜孜手箋及賻
贈道遠咸致之古道不可復高風良在茲再拜陳靈几中
懷永不移

生女

張禹何人斯愛女勝于男人情不相遠此意非所諳今俗
畏嫁女生女輒投溺溺愛固爲愚溺死抑何激婚嫁遵古
禮豐殺隨所遭練裳與竹筥厥風亦清高所恨膝下兒長
大遽拋棄富厚始來親貧窮轉相詈遂令父母心聞女便
攢眉預恐搜囊篋無暇望門楣伊予家中落本無可耽視
女復亮父貧賣犬卽行矣一女聊免俗二男亦匪多奈何
踰壯年又復遭此魔

白樂天生女詩云
細念因緣盡是魔

溺之誠弗忍舉之

非所樂至于婚嫁資較姊應更薄因思男與女教訓均宜
嚴嗟彼貪嗔輩皆由教不先何況婦德虧更貽父母累回

頭語山妻姑息匪大義

雜感詩

盧肇登榜首自謂奪錦標焉知主之者乃是李文饒辛苦
王僕射三出典禮曹榜首且如此其他安足驕雖然非公
義猶尚無私交豈若今時人貨賄莽相要苟非執渠魁一
旦肆市朝科名甚盛典祇資獍與梟赫赫王斯怒此舉邁
唐堯

敏中未第時不忍負拔基及其負贊皇顧已登相位富貴
是何物使人渝素志厚者變爲偷慝者變爲僞斯人不足
誅贊皇能無媿樂天與敏中薰蕕氣原異武宗求耆舊本
欲相居易沮賢昵不肖顛倒誠何意一朝攬太阿事事相
爭刺反若與奇章後先逞怨忮勿嘆報德殊此報君所致
弘農楊虞卿夤緣登要津遂使奔競輩日夕造其門雖有
蘇與張不及三楊尊舉場無公道寒峻啣哀寃維天選厥
辟維辟選才賢茲事鉅且重直與造化分胡爲狗鼠徒瑣
瑣相牽援生存投有北死去臭千年寄語後來人慎勿營
兒孫

西北有異獸其名曰窮奇聞人相鬪爭直者輒遭椎設有
忠與信食之無孑遺苟或逢凶逆殺獸往餽之物情不相
遠此獸性何畸豈惟獸性殊人性亦如斯不見逐臭夫淆

亂是與非嫉善如仇讐黨惡如親私居然覩面目窮奇曷足奇

種蔬豈不多勿種鷄蕩菜結交豈不多勿結屠沽輩屠家少仁心沽兒有市態當其初進時非不饒氣槩一旦勢利殊公然分向背譬猶酒家傭醒時稍忍耐毒藥甬中人狂噬遂無賴所以比匪交凶終有後悔鮑魚不可親芝蘭永爲佩

出門

懶性怯行邁况乃值炎曦居行兼有營欲去復遲遲人生未遇主所重親與師親闈不忍別師側寧久違今朝趣治裝出門信無疑子身走千里恐受僮僕欺穉子送我行先問何時歸顧惟命薄劣亨蹇難預知安敢事干謁慰此長渴饑

北峽關

悠悠木樨河綿綿白沙坂亭午至北峽征途始一飯出關路欹寄高低陟層巘青山無古今行人自往返伊昔遠歸時到此恒恐晚當其出門初離家懼不遠溝口宿可期舒城眠未穩驅馳復驅馳長耳亦何蹇

十里橋

游子中夜行日出氣已燠小憩道傍陰紛紛停車轂車上

何所有名花靄芬馥素馨與秋蘭昇向廬州鬻麻縛復泥
封萬里色猶綠此花在嶺東斬刈等薪木物以少爲貴移
來遂如玉吾聞廬鳳間禾死麥未熟嶺東花一車江南粟
千斛誰將買花錢窮簷起溝瀆

青陽

首夏苦鬱蒸應爲節候早况值時令乖寒暑每顛倒織絺
不敢御長箋那能掃汗流如水漿氣暍喉唇燥日暮投孤
村炎陽猶杲杲四顧少店舍最晚逢村老黃梁爲我炊煖
湯爲我澡酒味雖云薄情意故甘好因思黔滇間征夫何
披堅猶執熱裳衣積蟣蚤行役固其常昌暑曷足道

派河店

杜鵑旣送春布穀復催耕上天無雨澤安問秣與秔頻年
穀苦賤農夫心怵怵播種不得栽寧能無他營力田民之
本逐末亂之萌不見派河民相與辭墳塋湖南急征戰主
將方募兵逝將賣鋤犁飄然遠從征

店埠

迢迢金斗城憑高一攬轡此邦有諸彥

謂秦虞桓李秀升龔孝績諸子造

訪胡由遂征途有常程疾驅過城肆日暮憫跛驢徒行聊
一試忽然殷其雷咄嗟風雨至雖有禦濕具倉皇不可致
莽莽原野間四顧將焉避騎驢渡石橋一蹶損右臂謂當

霈澤通泥濘吾奚惴投店雷雨收晚霞色轉熾似妬遊子
裝真宰誠何意向夜百病作偶夢心猶悸鷄鳴問僕夫繁
星光照地

梁縣

我行已不先我僕常苦後中途雇蹇驢並轡相左右聽彼
御者言惻焉使心疚自云先朝時世隸鳳陽久有田不起
科歲釀烝嘗酒不知始何年更名曰地畝社長三十六搜
括到鷄狗累世免租稅此苦那獨受畏彼官長威情急舉
家走買驢獲雇直聊以謀升斗永痛父祖塋北望空回首
語罷輒歛歔予急掩其口陵寢且丘墟墳墓復何有生得

逃征徭死當見父母

護城驛

夜月方腫朧朝雲猶靉黳但願涼颼來敢與天宇晦一堠
復一堠良田委蒿萊盡日少人行空村無犬吠道逢驛馬
歸雲錦儼成隊蹇步已云遲馬行猶不逮芻秣有常給圍
人半省裁雖有驂與騶鞭箠非所愛驛馬恒苦疲蝨賊職
此輩牧民詎不然臨風發長愾

八都嶺

夜行侵星露晝行負炎暄預恐此行役悉種諸病根揮鞭
陟崇岡驕陽乘午繁如坐深甌中火氣上蒸燔又如焚柴

側烈焰相吹歎徒旅汗如雨問答寂無言達人貴安命寒
暑奚足論任運心自定冥慮道彌尊何殊北牕下高臥俯
層軒寄言觸熱子勿惰亦勿喧金石經百煉肅焉清心魂

麻王集

長路爭凌晨稅駕日未晡村店人馬稠雜坐吹笙竽手持
白玉鞭腰懸金僕姑或言走江西或言適東吳非兵亦非
商分道徵官逋嗟彼讀書客累年羈皇都長安米不飽無
計營吏胥荏苒始補官裘敝黃金無資緣貴人門操劑假
微需借日不滿百之官已千餘追呼行且至安得無貪汗
必若救斯弊惟有清仕途壅滯盡疏通吏胥廉且愚目送
人馬去赫赫威焰殊不知何方民危哉肌與膚

沙澗舖

病目苦朦瞶天宇復氛靄行行數十里適與官長會巍巍
平肩輿騁望絳紗外青絲爲輿帷綠羅爲輿蓋怒馬復鮮
衣後先擁旌旆行旅聞鼓聲望塵已狼狽余亦遭譴訶下
馬整衣帶僕夫驚相語邑長一何大鳳陽十三縣茲縣應
稱最嘆息謂僕夫此義爾所昧苟能撫孳嫠驕侈夫何害

總舖

野店蚊蚤多夜涼不安宿月光已入扉僮僕睡猶熟客夢
何曾成馬上時一續奈何執御人卽事多感觸爲我指山

木里集五
頭殺氣隱巖谷昔在弘光朝四鎮勢反覆逆帥遂無賴江
北恣荼毒憤此山寨民攻殺禍尤酷中有六七家老穉盡
屠戮至今陰雨天白晝聞鬼哭我聞重歎嗟久念氣益熹
殺人不能制國典胡由肅悠悠彼何人忍使民生蹙興亡
匪偶然用武不可黷

臨淮縣

早行乘涼颺望望臨淮畔水繞女牆低烟籠官渡亂疾風
吹洪濤迢迢接河漢舟師談笑間已及中流半隔河屯獵
騎平蕪滿沙岸臥虎沒紅翎飛鳥落金彈因思李小侯馳
擊雄里閨風流竟何存懷人復三歎

固鎮驛

烈烈炎光流灼灼火雲布鵲聲驛路長草色河橋暮刈麥
者誰子纍纍尾婦孺乾穉紛挂地拾取遂無數忍者有仁
名貪者不能妬遺秉與滯穗此風庶一遇上天無偏頗人
情故異趣此地樂晴和收穫及農務焉知皖桐間嗷嗷待
甘澍

宿州

宿州古侯國衰颯如荒村寥寥纔數家有戶無重門借問
州父老苦云戎馬繁兵戈未衰息海風天地昏去年罹大
水麥爛豆無根八旗自北來飢民益逃奔賢哉州太守爲

我申煩寃但備車與驢無復饗與殮豈知虎狼性百計恣
噬吞鞭撻我饑民流血染輶轅雖有驢千頭改折始無言
頓兵三兩日食盡雞與豚苟匪雞豚力此屋無一存

褚庄舖

日午始朝餐麥味薄且醜老翁進我食三歎前致辭君今
居南方焉知北地饑去夏午日雨連陰中秋時斯民行爲
魚稼穡安可期至今大河北渺如千頃陂此地猶少蘇前
路更淒其君過夾溝驛瓦礫雜蒿藜糠粃不得飽剝樹啗
其皮君看道傍樹方知民生危今年麥甫熟菜色起疋羸
非時雨水雹枯穞復離披兩年失麥秋溝壑將奚辭勿嫌
此味薄此味知者稀

徐州

十日走風塵今宵釋芒屨干請豈我輩將前行復却僕夫
彼何知卽次咸踴躍山雲間茅茨烟水環城郭由來名都
會懷古猶如昨緬思韓與蘇高蹤渺難度一爲朱旛守一
入青油幕大節炳古今精靈歸冥漠夫子柱石姿坐鎮饒
偉畧治兵訓餘艤賑饑起錢鏹黃樓何崢嶸河伯亦咸若
韓子吾豈敢蘇公如可作入境聞謳歌民生一何樂寓客
亦歡顏門牆欣有託

木厓集卷之五終

木厓集卷之六

五言古三

寄陳簡菴

去年董子歸得君彭城書我今來彭城君返谿南居相距
二百里相別三年餘咫尺不得見北望空欷歔憶昔坐君
堂古木森階除寒宵傾杯酒酒美肴饌殊驥子遞酬勸灼
灼雙明珠別離遂至今夢繞谿南隅君才本管樂艱危濟
時需詩篇與書法一一存楷模所惜時命薄動與窮愁俱
比聞邑大水漂沒到城郭稼穡復幾何得無減田租谿南
好柳色別來倘更舒水患雖云災枯栢未應踈大男當長

進中男又何如對此時排悶亦足消居諸伊予罹凶閔盡
室多憂虞飢驅孰可去乞食非良圖翻因故人近決意來
彭徐君如不果來我當訪君廬共榻寫離悰庶用慰窮途
讀楊士佳司理祭相國史老師文感賦

本實既已撥大厦胡不傾運會有遷移智勇弗能爭哀哉
史夫子報國矢忠誠金陵雖失守力捍維揚城勢去始捐
軀大義炳日星泯泯十餘年衰草沒荒塋疇肯灰燼中一
酬知遇情楊公敦古處酌酒披榛荆覽彼祭誅辭颯颯悲
風鳴更樹墓門梅悠然想孤貞伊昔撫皖時縫掖聞談經
及予遭荒亂挈家遊舊京眷言走書幣參軍淮揚營母在
未敢許逡巡謝友生夫子曾聘予參軍屬吾友胡
子即公趣之余以母命未赴自違夫
子訓蹭蹬迄無成永懷國士恩浩歌淚縱橫孤塚不得拜
汗浹心屏營

早蟬

離家剛三旬新蟬聲唧唧秋風猶且遲秋聲一何疾往昔
在家園入伏蟬方出可憐游子耳聽此意如失時斷復時
聞初鳴便已密牢記此何晨五月既望日

彭門行輓陳烈婦彭氏

人倫始夫婦從一固其常世衰道寢替婦德亦已涼卓哉
彭門女結褵事尊章遵實絜棗栗矩步施珩璜中宵聽琴

木里集六
瑟其聲清以揚胡爲不羈子冶遊少年場脫簪弗見庸一
疾罹禍殃君自居外閣妾自守空房六年不相見邈如參
與商譬彼放逐臣恩義亦少戕一旦殞所天家人舉傍徨
婦外若弗聞惻焉心內傷好語集家人開我嫁時箱小姑
解釵釧群婢分衣裳然後召昆弟背指燈燭光燈滅不復
然大節凜冰霜丈夫受國恩君死一朝忘脫或遭棄捐背
叛分所當我歌彭門行聊以媿無良笄珈有至性鬚眉胡
不臧

濠梁行

濠梁距豐沛不及五百里如何千餘年真人後先起暴秦

本虎狼胡元亦蛇豕開創與驅除功德畧相比佐命有元
勲蕭曹暨徐李亦各攀龍鱗少小同桑梓懷古披輿圖誤
擬山川美今來歷此地平原莽榛杞風俗尚武健辭氣多
麤鄙雲氣旣虛無火光亦偶爾始信天授姿不關山與水

閔子里

朝辭宿州城行行渡睢水云是古符離破屋叢荆杞向午
至夾溝凋殘復爾爾顧瞻國戚塋締造昔何美丹堊竟剝
落墻垣亦頽圯三歎未及終日落西山紫僕夫爲予言今
宵宿閔子我聞重歎息茲名伊誰始閔子古大賢姓字垂
青史下馬拜祠墓肅焉景芳軌曷忍輿隸輩直斤其姓氏

我欲增一字伐石樹荒市敬告後來人稱曰閔子里

初入濟幕述懷五百字呈方蛟峯觀察

總角事柔翰膏晷窮圖籍雅欲掇青紫志不在金帛荏苒三十春壯心轉跼踖田園旣荒蕪婚嫁復絡繹况兼死喪威門庭日蕭索豈惟富貴艱坐使生計迫三喪暴親骸二項逋官責私與婦子謀家食鮮長策饑來一叩門庶用謝交謫因念宦遊人夙推文章伯丹筆翔秋曹綸扉許前席憶昔論交初傾倒金陵陌投分膠漆堅志合匪形迹今雖官京華杵臼誼猶昔不少冠蓋遊懷舊聲嘖嘖薄言訴此情或肯拯危阨尺書附令弟再拜手加額上言窮愁人頻

年窮益劇禁網方肅清遨遊靡所適竿牘枉相投書記稍有益君今盛交遊吹噓倘不惜苟得升斗需願爲青油客從事一二年囊篋有微積上以完征徭下以安窀穸君親兩無憾曷敢辭行役感君有報章明命敬無斃豈知逾數旬濟陰標檠戟我時寓彭城除日猶未獲君已郵書來欣然遠徵辟趣歸告母氏茲行得所擇願母調藥食晨昏安枕蓆親故聞我歸慰藉情脉脉主人是故人餽遺必踰格遂弗解征裝飄爾摩霜翮幙被無新裁書卷仍做册病妻尙懷妊忍淚出帷帟抱女前致辭歸及食新麥三日過廬陽六日濠梁驛十日渡黃河半月抵官宅握手驚來暮離

情始一釋見我裋褐單殷勤問刀尺側聞服官操飲水復
茹檠預恐分俸廉受事還踉蹌既念公長者肝膽照人赤
白君下車來河濟霈甘澤父老皆霑濡聲名且赫奕焉忍
惜微膏舊雨輕拋擲益用攄中誠佐君理煩曠庶幾捍巖
疆鴻猷鑄金石退食如有暇且復數晨夕

歲暮憶小兒女

少時婁生子蚤歲輒不育雖有三兒女後先罕相逐子先有一

女兩男齒髮皆相距甚遠何期四十後老蚌連生鞠去夏甫夢虺今秋

復產犢方睟試阿柔小女名羈旅雲龍麓時客徐州如何阿遠小男

名生又復滯濟瀆殘年懷故鄉久客思骨肉俯仰庭階間

念爾額尤感阿柔方學語阿遠未入目應知婚嫁時予年
已望六修短况有數耆艾難預卜安忍遠別離風塵久僕
僕誓將春水生薄言返初服

濟上吟

予以庚子秋入濟幕聞見之間有足感者因效白少
傅秦中吟爲詩紀之事不盡繫濟曰濟上吟志地也

昌平州

嵯峩天壽山乃在昌平州遙臨白浮村俯瞰高粱流龍翔
復鳳舞靄若雲煙浮河嶽所鍾孕靈秀莫與侔巍巍十二
陵千歲居上頭緬懷肇造日殯宮深且幽旣葬同軌至羽

葆颺旌旂寢廟皆九楹繚垣悉丹髹金鏤與玉匣珍秘羅
天球鬱葱三百年疇敢盜一抔自遭喪亂後思陵闕未修
龍輜旣已遠石麟不可求至今陰雨天悲風聲颼颼不聞
馬鬣封但見狐兔遊雖有故舊臣祇貽前代羞驅馬入長
安誰肯一回眸赫赫 今天子討賊殲同仇今年幸昌平
翠華臨道周俯仰園陵間怒焉有殷憂顧念甲申變淚下
霑黠旒因與諸臣民追維失國由謂彼圖治意宵旰不遑
休喪師匪失德贊襄實罕儔焉忍賢聖君零落歸荒丘其
各輸金錢薄言肅松楸以上皆繫括論中大意此語真聖明此舉足
千秋士庶且流涕何況東陵侯新恩不能報舊德亦當酬
不知冬青樹尙待唐生不

撫賊

濟上古都會南北成通衢遠接豐沛壤近隣鄒滕區復與
虞城連三省聚逃逋頻年水旱災出沒無時無白晝躍弓
馬禦人於泥塗未晚劈門扉拷掠及妻孥大或攫金錢小
不遺袴襦百十自爲群殺人直須吏遂使居與行無計避
豺羆夜宿不解帶晝行無安趨嗟此盜賊藪處處皆萑苻
居民誠可憫行旅復何辜雖有賢守令誓欲靖根株胥吏
不用命左右皆賊徒賊逸官謫黜惟有長嗟吁不知始何
時許賊得自輸厥名曰投誠一投便無虞翻臚多名姓某

賊住某都符牒分途出曾不少踟躕奸宄倖得脫良民反見拘及至訊鞫間所言多仇誣仇誣縱可雪肌髓半已枯不及投誠賊公然有完軀行營以爲家月糧以爲餽漸次出金帛竄名執銅符仍復潛殺掠無人敢號呼若輩本狗鼠豈容稽天誅撲之卽不易撫之一何愚必欲撫若輩莫若嚴其途或收其妻子或沒其田租待以不死法捕賊使前驅所捕多且真方得保頭顱踰期無一獲黥面刻其膚獲者脫不實立寘于王鈇國法旣已峻民困庶可蘇寄言謀國者撫賊非良圖

逃人

新律仿前朝重輕畧相似惟有逃人法森峻莫與比諸王暨八旗入關收奴婢此輩狡且獯潛逃歸桑梓隣佑復隱容法嚴自此起始設督捕官大小飭綱紀左右兩侍郎樞府重所倚武選與職方卽署有專委更有理事官禁網益密邇苟或匿東人榜掠立流徙仍用連坐法株累及鄰里至于所逃人黥面復鞭捶謂當遂廓清令下疾如矢胡爲日見告搜捕猶未已甚或遇奸民借名肆機詭愚氓墮罟獲流毒將安止緬惟立法意火烈良有以名雖稱主僕君臣無異理豈容狐鼠輩竄逸靡所使但願吏奉行慎無爲禍始不見汶上縣一嫗老無齒有子隸八旗十有七年矣

去秋忽言歸母子笑相視朝投顏氏村莫收縣獄裏其子
誠當誅其母盍姑俟何爲赤日中展轉無停晷械繫到京
師又復赴濟水自言七十餘恨不須吏死無夫已有年獨
居饜糠粃一兒甫九歲離亂陷營壘分爲溝壑泥一旦拜
階祀慰問未及終吏卒來如駛焉知逃人法不容母留子

逋賦

東南盛財賦積逋良有因軍興旣旁午水旱復洊臻所以
江浙間賦逋民愈貧其中大郡邑冊籍密如鱗一年復一
年動積十餘春前官甫罷斥後官仍遭迤匪無龔黃輩亦
有卓魯倫一聞典此地淚下足逡巡不見蘇郡守五年遷

三人明知罹罪罟弗敢一言申苟非蠲積逋吏治胡由淳

我聞兗司馬李公

名正華
北直人

清且仁天官最治蹟晉秩馳朱

輪除郡乃松江事繁俗難馴公獨叱馭去攬轡行駢駢雅
尙勵冰檠植節如松筠下車訪利弊微服前咨詢首先除
稂莠吏民畏其神豪右皆屏跡群盜亦還醇然後布惠愷
甘澤流江濱謂宜賜金璽立可致要津一朝聖吏議拂衣
甘隱淪歸權不得發金甌徒生塵歟有數父老買舟維河
漕器具悉殺列食用咸羅陳其餘感恩者奔走無昏晨或
抱布數匹或持錢數緡或挈室中藏或輓村中困紛紛競
投擲不言何鄉民哭泣震閭巷攀送咽城闈嘗聞史所載

其事恐未真選錢送劉寵遮道借寇恂何幸當吾世尙親
鳳與麟李公洵長者愛戴如君親得民已如此長吏胡怒
嗔祇以積逋故坐失循良臣

李公事張揆原水部爲
予言其詳張松江人也

牽夫

江南苦捉船淮北苦拽牽軍興十餘年年年事征戰或班
師北歸或出師南援艤艫蔽天來先期飛羽箭牽夫動數
千沿河檄州縣長令急勾攝窮黎已眊眊地畝與牌甲均
派淚如霰部議禁民夫徵調仰驛傳站銀及正額僱募仍
從便其如驛站銀名存實罕見正額復協餉安得有餘羨
美意雖可嘉仁言豈能踐不見已亥秋王師出畿甸舟經

齊魯邦長令遭訶譴中有三郡邑奔走如掣電可憐千萬
人赤脚走淤澱越站肆鞭笞氣絕血猶濺死亡七百餘泥
沙足埋竈更有千餘人流落他鄉徧嗟此亦赤子魚肉任
武弁豈無獨子親亦有空房眷飛去復飛還不及梁間燕
朝廷聞此情惻焉色爲變八旗各有長下令疾推讖仍復
勝河干勒石曉愚賤自非出征師索夫敢專擅天語雖煌
煌奉行惜不善一遇兵船至供應仍鍛鍊我聞船舵手鎮
日惟酣讌曷若著爲令人各給米麵俾彼自挽拽焉敢辭
勞倦敬告大中丞此疏盍早繕

大巡

粵稽古先王五年一親巡漢興典禮廢始用御史臣暴勝
衣繡衣張綱埋車輪皆能稱厥職惠澤被斯民沿及唐宋
後慎遣猶頻頻所貴持風憲爲國不爲身柰何執法吏先
以枉法論雖有鉄鉞威怙慝終不悛廷議懲此弊欲罷復
因循昔有翁御史蹇諤冠朝紳夙懷澄清志誓欲一朝伸
拜命巡宣大朝辭夕駢駢霜稜馳萬里鞅掌無冬春邊風
吹黃沙手足爲皸皸所務察民隱利弊廣諏詢貪墨皆解
綬軍吏畏如神直聲撼山嶽正氣肅秋旻事竣復朝命謂
宜遂卽真俛仰叢竹間僅還舊絲綸借問是何故手無金
與銀必執御史法難救御史貧大法小斯廉風厲良有因

憲長無苞苴察屬知所遵臺端根本地得不簡忠純近聞
又議罷聚訟轉相嗔廢置率如此治平胡由臻自古無治
法所貴有治人當其選遣初首必拔殊倫更嚴考課法不
得久沉淪庶使清白吏勁節達楓宸根本苟弗治何以秉
國鈞

河夫

濟上諸州邑地衝田復荒或近運河側或臨黃河傍運河
勤䟽濬黃河慎隄防因有徭淺夫歲役以爲常昔在天崇
間半鎰足糧糗湖地猶可畊薪水得自將不知始何年以
地爲池塘畊種有厲禁民心愈恐惶區區十二金安得充

飢腸其夫多倩代奸民益不良私增輒數倍窮黎焉能償
脫復緩須吏需索如虎狼代役一告訐正夫遂逃亡胥吏
復中飽僉點網厚贓畝多者得脫畝少者罹殃畝少力復
弱苦累不可當更有豪右輩隱寄于他鄉紳士因爲利其
名曰寄莊一入仕宦籍夫役免不遑下及輿臺流此苦亦
未嘗惟餘幾窮黎終歲代桃僵富者日以富貧者日以傷
此弊不蚤剔比戶歸北邙剔之將若何按籍稽行糧行糧
有多寡夫役與頡頏貧富旣已均苦樂可共商然後議加
額公私兩無妨河夫雖重務民命未可戕不見挑淺夫負
錘淚成行祗以數畝地難填代役曩歲除不得歸泥土飽
風霜爲問輦上人謀之胡不減

大赦

先王制五刑本用懲奸僞時或赦青災一寓解網意木鳳
馳紫泥金雞飛丹翅大赦亦偶然詎得常希覲所以古名
臣曠典不一試吳漢與孔明尤能明此義後人好市恩恐
非國家利奸宄氣益揚何以勸善類頻年頒赦書驛遞無
停駟昨歲命未旋今朝使又至揆厥好生心非不同天地
其如作奸者恃此益橫恣山東群盜藪殺人亦容易當其
犯科時便欲冀宥肆設或罹禁網宛轉昧胥吏經年無爰
書百計圖規避直待恩赦來一朝頓無事案牘非不多充

棟日填委惟有援救牒日夕來如駛我思管夷吾立言亦
善譬謂赦爲大害猶犇馬委轡貪墨當誅鋤黠悍合流棄
公然保身家逍遙鳴得志反使善良人不勝憤且恚刑賞
弗能平勸懲何由遂勢必驅愚氓盡化爲鬼魅我聞賢君
相銳意追古治古人赦恒少赦少民恐惴今人赦恒多赦
多民無忌必若師古人此事勿輕議

喜晤孟傳是孝廉賦贈

束髮讀君文私擬必耆宿今朝喜見君丰儀美如玉始信
夙慧人蚤歲挺芳躅令嗣項楊儔岐嶷秀眉目是父有是
子夙慧定可卜云何甫數歲天涯遠徵逐兒駒走千里不

受人羈束明發入長安追隨曲江曲佇應童子科聲聞騰

輦轂何時鳳將雛一憩桐山麓

傳是云將有龍眠之遊

登曲阜城樓望尼山有作

返照入城樓携手城樓邊東望望尼山雲氣何蛇蜒五峯
在其後一洞在其前右與昌平接左與顏母延河岳鍾靈
異毓聖非偶然我欲往從之薄言觀逝川山前有明發還觀川亭
濟水吏人趣歸鞭相距六十里展拜竟無緣蔚彼松與栢
此意渺難宣仍趨闕里廟重復瞻几筵犧牲方羅列邊豆
昭明虔時將以次日丁祭徙倚杏壇側奕襖尙流連何況七十子
親炙久且專徘徊不忍去日暮空風烟

三月二日仁標入塾作此寄之

憶汝初生時值予遠作客小奚忽來聞欣然手加額明年
試晬盤又復天涯隔聞汝揮百翫首探古圖籍心知此兒
佳珍愛逾和璧老大無一成教子意轉劇去年來濟水牽
衣不忍釋預訂入塾期三月梨花白昨復寄書歸良辰特
遠擇王母旋致書此日百無厄此子亦就繩嬉戲不如昔
我聞亦忻慰猶恐時日迫今朝重念汝獨坐情脉脉念汝
出拜師初識點與畫誦讀期有用光陰勿輕擲願言紹書
香無斬箕裘澤弱冠蚤擣毫入對天人策若無青紫分著
述良有益慎勿似汝翁筆墨爲人役

不寐

春來晝漸長晌午一假寐張燈觀書史就寢二更二平明
輒披衣眠起有定次昨日未晝寢將昏索枕被豈知夜未
央夢覺魂驚悸歸思走千里滿懷堆百事祇爲夜眠早奪
却五更睡因悟盈虛理憮然發長喟寢興且有限晷刻難
假易何況富與貴焉用枉希覬

憶鷹阿草堂兼寄與踈屈遠兩上人

自我營草堂于今四五年放鷹山北面大羅菴西偏屈指
五年內每到輒言旋惟有落成初日日山中眠朝起聞晨
鐘暮看夜坐禪青山如翠屏鎮日當窻前有時去溪頭俯

聽水潺湲久諳山水趣別有妙難傳月下泉聲佳可餘山
更妍如是者累月會心親且專一朝謝巖谷遂爲世網牽
昨歲三月中尋春亦偶然忽到此禪刹重逢好山川海燕
巢仍舊林花開逾鮮遠公留不住送別溪橋邊今我來濟
幕形神久拘攣山水與花樹春來無一焉夢覺忽有懷神
遊大羅天是時三月中空階月正圓永夜不能寐思聽山
中泉作詩寄上人爲我留風烟短墻如可築傭直勿論錢
吾將還鷹阿同種鷹阿田

四月五日追哭亡友陳子垣

去年當此日遠遊甫戒裝我友忽長逝惻焉推中腸因復

停車牽含悽爲治喪十日始得發倉卒去彭城叶辰雖有

哀輓辭中懷不及將齊生文字豪謂古愚也咄嗟成誄章所言

皆至性足以慰良朋叶蒲光切予懷終耿耿逮今有餘愴叶初良切

念昔初知子軀幹豐且長一見揖予前稱許比珪璋顧謂

齒髮殊忘年匪所當維予有仲父從父如虹才辯足頡頏結爲

杵臼交久要無參商予雖尙幼小竊有知人明叶謨郎切退歸

語予季此君溫且良其貌若和易其中直以方擇友若擇

君焉可昧所從叶徐王切自遭寇亂後天涯各翱翔避地趨建

業聞君亦鳴榔金陵負天塹是時猶小康吾里富文儒鼎

立樹麾幢君實握牛耳方吳與騰驤方繡山吳定辭左挈蛟臺伴

右躡白門蹤

叶郎王切

雄文懸國門意氣何飛揚未幾狼狽歸

逝將老耕桑舅氏好文辭奉君主齊盟

叶謨郎切

招我二三友

染翰鬪雌雄

叶胡匡切

文藻追姬秦風騷薄漢唐鈇諸梨棗間

鴻寶騰縹緗君尤重然諾信誓殫中誠

叶辰羊切

酒酣時拔劍

傲骨轉昂藏謂當比金石生死母相忘中道多改路奔競

遂不遑鄙性愚且固守拙固其常君亦嫉翻覆大義凜秋

霜寧守貧賤交弗逐綺繡場射策屢不第囊書遊帝京

叶居

良切雲中有故舊

方還青司理

聊與謀稻梁邊塞數千里手足凍

欲僵甫獲升斗還旋走嘉陵江流觀山水勝激發為秦聲

叶尸羊切大言勒鼎鐘小言如琳瑯歸來發篋笥諷誦音縱縱

嗟子本善病中年罹厄窮

叶渠王切

跋涉雖壯遊肌理或已戕

入門見容顏使我心徬徨果言別離後一病中膏肓骨瘦

神猶王醫藥倘可償胡為甫經年哲人遽云亡君昔憂無

子兒女今成行嬌兒託執友

姚黃有

蚤拜為婦翁

叶烏光切

嬌女

甫納采門徒嚴尊音

力叙

婚嫁卽未畢付託靡不臧君有

兩故人卜居秦淮傍足辭官太史繡山尚書郎薄言往從

之猶可作居停

叶徒陽切

脫復厭風塵不欲離故鄉處士

李士雅

與司理

方還青

皆各擅詩名

至於吾黨士更番登君堂有詩倡予和有酒可共嘗記君

病篤時典衣具壺觴悉召諸親故一一手自傾

叶由王切

其意

若訣別越宿果考終叶諸良切今人有酒食生存饜虎狼誰能
瀕危際懷舊猶未央念此真摯義亦足媿頑涼晨起忽思
君歲月倏已更叶居郎切孤生寡弟昆哭君如哭兄叶虛王切勿云
有宿草無爲苦悲傷

庭槐有鵲巢忽墮一雛哀之

方夏槐陰濃林間鵲始乳殼卵雌所伏蟲蟻雄所捕雨霰
與風胎响姬幾朝暮啞啞欲試飛雙翅纔生羽一朝起狂
飈危巢雛忽仆展轉泥塗間無力飛上樹呼童丐汝命巢
中急安措樹高不能攀欲上心還怖嗟彼雄與雌哀鳴情
如訴飛飛繞簷楹依人了無懼送寘屋瓦間雄雌遙相顧
自是猿斷腸豈必烏反哺見者空嘆息生死良有數獨我
一涕零祇爲殤女故

方爾從至濟聞其從兄繡山有黃州之行懷之

念昔聞雞時同學五六子才大齒又長惟君執牛耳眼見
君得官鄉黨耀金紫郎署歷八年又復歸田里爭教泥塗
人不益老可鄙得官不羨君羨君能知止方今勢利場奔
逐紛如蟻躁進猶恐遲勇退誰復喜豈無前朝臣家食田
園美尚復博一官展轉弗知耻亦有書生輩鬚白口無齒
談及舉場名攘臂猶未已君本當代豪布衣掇膺仕不比
失節婦靦面曳羅綺况年方五十服政今伊始不比曰頭

翁龍鍾戴貂珥胡爲早拂衣官職等糠粃寥寥二疏後于
今接芳軌美君乘春潮沿江采芳芷遠爲子擇婦擊汰漢
湘裏雪堂如可採竹樓未應毀何必婚嫁畢五嶽從此起

苦熱行

季秋遠于役歸期已預指敬告賢主人辭別及夏始那知
家書來母病女復死因此益迫切固請不能止豈獨畏炎
焔實用懷桑梓主人堅繫維公事復填委遷延及長至始
得執鞭弭北地多平原一望彌荆杞罕有惡木陰難得泥
泉水如縛巫與覘重衣暴炎市冉冉十五日煨煉無停晷
顏膚皆黧黑蒸灼到肌髓無計避煩煎疾病可立俟石經
竹木佳鷹麓山泉美長夏枕圖書高卧叢陰裏早知征途
間毒熱遂至是雖獲千鎰多不以此易彼何況垂橐歸蕭
然乏行李

店叟

南歸甫三日煩熱無與比遙遙望故鄉尙有千餘里晚憩
七山店有叟白髭鬚入門疾呼頻清泉乞一盂叟顧視之
笑寒暑自有時客何不自耐畏熱一至斯農夫治夏畦征
人爭汗馬大小雖有殊名利均難捨觀客言貌間商賈似
不屑得無落第歸憤懣有餘熱聞言不敢欺欲語轉羞忤
我本老布衣從事青油幕叟云信若是雖熱何足惜吾聞

名利兼當今惟幕客舊人秉節鉞書生多從戎苟能投所
好皆得冒軍功亦或假聲靈恐愒其僚吏百萬攫金錢歸
作兒孫計脫復生健美徼倖欲得官輦錢入京闕夤緣亦
無難名利誠兩獲幕何負於人羞辱且不避焉能免苦辛
客意將何爲寧出兩者外枉尺而直尋願客且少耐斂容
謝不敏是非長者言凡叟之所誇我實無一焉故人官廉
訪召我掌書記但得分俸餘足了官私事答言未及終搖
手塞兩耳客乃一腐儒祇合守田里方今大小官養廉本
無多妻孥尙不飽分俸能幾何主人卽篤厚安足救貧窶
勿復歎苦熱此熱客自取

將之黃州呈母大人

夙昔耻干謁安貧守敝廬自遭荒亂來田園成丘墟家食
苦不飽薄言脂我車我車歷四方所至輒靡虛今年困益
甚仰屋徒歛歔穀賤無人糴空有擔石儲故人招入幕貽
我尺素書所嗟道里遠兼恐時日紆雖復西江水安能活
鮒魚楚黃壤相接親知誼匪踈况有二三友決計驅跛驢
老母聞我行辭顏鬱不舒遊人滿冠蓋遑及樵與漁投托
倘相失不如慎厥初長跪謝母言欲行還趨起忽聞叩門
聲中堂坐吏胥租賦索金錢米粟如土苴稱貸奔鄰家空
囊無復餘明日逝將去不復少徐徐嗟我鼯鼠腹所糞升

斗糈輕裝雖無幾行李費拮据再拜辭庭幃言歸及歲除
重違慈母訓臨別復牽裾

潯山道中

客行潯山道日暮投茅茨荒店門扉乏兼無壁與籬向夜
天忽變雨打風復吹衣裘皆濡濕寒威裂肌脾雖在室廬
中無異露處危主人何不怒反嗔徒旅嗤自夜達天明無
一勸慰辭所喜輿論直能知父母慈言有前邑宰善政到
今垂自彼下車來訟堂無人窺租賦取正供苞苴絕餽遺
官齋何所有白種菽與葵一飯纔脫粟家人恒苦饑至於
茹吐間矢志撫婢嫠有利靡弗舉有害靡弗吝算田斥豪

強均役起衰羸豆區至微小市人不敢欺自稱有世父臨
行致良規寧遭上官罵勿貽父老悲所以清白操五年廿
如飴一朝遷擢去哭送到江湄極盛信難繼餘風猶可追
我聞重歎息古道良在茲貪吏滿天下只顧飽妻兒白晝
攫金錢奚畏暮夜知吁嗟此廉吏匪獨明心期上膺不次
擢下留去後思誰云時代異廉吏不可爲

前邑宰常公名大
忠山西交城人

抵黃州

仲冬晝昏霾疾風何飄忽入境逢吏人不敢言干謁側聞
謳歌聲輿頌曷忍沒牧伯賢且仁辛苦事征伐行間動經
年甫離豺虎窟便弭黃梅輶又乘鄂渚筏嗟予倦遊人客

囊半已竭解鞍拂征塵且圖筋力歇茲邦多名勝赤壁最
超越不待主人歸酌酒酬江月

牧伯謂太守何道岑也

曹尚白爲老母序松聲閣集賦謝

伊予早失怙依倚慈母膝母本女史才少小工詩律禮法
秉郝鍾門族擅尹姑卽事賦篇章積久遂成帙母輒呼兒
前機杼吾事畢有懷不能舒偶一摘花筆譬如寒旣深候
至鳴蟋蟀不欲子孫傳安與後世述殺青亦偶再縹緲虞
殘佚何期大君子贈言炳雲日樂善溯其源稱人必以實
毋豈曹大家君乃皇甫謐再拜謝瓊琚友誼托膠漆歸去
獻北堂茲遊豈蕭瑟一字直一縑奚啻千萬鎰

同王寶臣遊安國寺訪雲白時習兩上人有懷晦山

和尚

散步出郭門晴日被廣甸煙靄旣清疎林風亦平善行行
闐闐殘樹杪浮屠見衰草乳母墳荒基定惠院琅琅聞鐘
聲石梁水微濺披榛取曲徑摳衣登佛殿上人梵誦餘茶
爪留客便清言見禪機竹石徵雅撰因憶蓮社賢祖庭復
何戀

晦山時住錫四祖山

匡牀挂瘦瓢虛室存几硯遂穿蔬圃歸漸

踏香林徧

復訪鄰菴潮音師不值

賴君幽興熟江山始識面雖無濟

勝具詠歸弗言倦不有同心人嘉會疇能踐

何牧五邀同方四顏何胎墨遊赤壁

赤壁誠何趣撐拄大江邊停驂繞小憩杖策登層巔獨遊
苦未愜幽賞或已偏之子懷古懽題榜清且妍選日携琴
尊招我俯晴川復有素心人相與弔昔賢整衣拜遺像風
骨何翩躚江流自萬古作賦亦偶然遣興彼一時豈期後
代傳安知今日會不足垂千年

振衣陟崇臺一覽江山具微寒酒易醺欲霽天還霧遙峯
隔岸青半爲烟雲護但見江中船風帆疾如鶩赤壁在嘉
魚此或非其處寄托自高曠何必不偶誤英雄與才人轉
盼俱成故懷古發長嘆言歸日已暮木末起淒風山刹見
微路何當理烟櫂更問寒溪渡

木厓集卷六終

木厓集卷之七

五言古四

二女篇贈王生某

石溪王子某口高子旦今皆有才爲予門下士今高
子已受知有司而王子猶坎凜不偶覽其近作爰賦

斯篇

石溪有二女門閥皆瑰異年齒略相當容顏各自閔携手
登繡牀姊行妹居次同事綠窗前花鳥等工緻老嫗來何
方二女競迎致阿姊勅中厨阿妹擁長簪再拜執巾櫛願
爲嫗也侍焉知嫗命薄垂老仍憔悴但教古法繡不問今

人嗜采幣一朝來阿妹羅珠翠
綸翟搖明璫寶釧繫玉臂
雖未宐室家已許好門第
阿姊獨長吁二十猶弗字
邂逅逢老嫗不語中含愧
嗟女且勿悲紅顏豈終棄
點檢繡匣中組纂轉明媚
嘉聘會有時與妹迄無二
所願勵女箴共期四德備
彈指百兩迎雙鸞耀帟帔
道傍觀者多老嫗亦竊視

壽方母六十

昔予修邑乘雅欲敷芳軌
其在嘉隆間先賢尤景企
曰有方孝廉名洵淑問煽蘭芷
謁選宰紫溪及朞政已理
至今黃華村遺行芬人齒
餘澤被後昆德教及簪珥
賢母誕華宗來歸鳴珂里
相夫教子孫志在續祖妣
羊機無晨昏熊丸佐膏晷
未幾隕所天椎布謝羅綺
誓以冰檠心九原報夫子
教成雙鳳雛子隣子哲早歲樹文壘
伯氏屬橐鞬仲氏執鞭弭
諸孫繞膝前頭角復鵲起
嘉茲揆覽辰霜後蟠桃美
海鶴何翩躚緹笙亦填委
誰謂花甲周眉壽從茲始
祝言附衆媿爲母進一七
仕蹟固可嘉內範亦堪紀
管彤會有時願言告惇史

贈施子壯少府

昔我大王父曾官浙中丞
抗疏爭雲霧遺愛至今稱
厥後兩從祖宦浙亦頻仍
觀察蒞西湖廣文官禹陵
禹陵鍾靈

秀賢喆競蜚騰是時公方壯旅進如雲鵬力揆宛委籍迅
掃剡溪藤廣文下車揖不敢當師承握手締交懽相與爲
友朋未幾揚皇路姓名天府登翩然來巖邑盤錯試風稜
明比霜刀刮清如玉壺澄多君邁流俗古處慎愛憎猶復
念舊遊推分及孫曾所愧樗櫟材平生無一能謬叨知己
遇忼慨徒拊膺何當凌霄漢與君稱代興庶報世講茲此
中常兢兢

喜許綏人舉子

吾黨皆中年兒曹鮮壯圖尚有一三人未獲掌中珠嗟君
年少時西河淚幾枯荏苒及壯盛此志徒區區門庭廿餘

載不見矢與弧人種覓無計相對惟長吁前年買絡秀意
豈在中厨設輓睟方周徵蘭夢果符生子本尋常晚得故
足娛我聞喜動色狂呼語妻孥哲人必有後此言良非誣
疾馳爲君賀不覺道路紆入門發大笑喜極捋君鬚湯餅
尚未嘗試啼聲呱呱顧謂予父執命名勞見諏謝庭玉樹
佳得一已芬敷

綏人屬予命名
予以佳樹字之

如彼禽中長丹穴產鳳雛

又如馬中龍渥洼生神駒何必八九子啞啞城頭烏我有
三男兒秉弱性復愚所幸託門牆猶子義無殊行將爲弟
昆虜墮共提扶棠棣無異萼荆樹自同株富貴非所期但
願學爲儒

除日賦謝馬正誼姑丈二首

時爲定陶令

廉吏不可爲清白風已邈自我渡河來頗聞輿論確祝詛
不同詞微言剖清濁共稱陶丘宰政聲擅循卓服官六七
年廉隅慎追琢曾無市虎喧漸見澤鴻數減徭困已蘇蠲
罰恩方渥夜火不閉門有吏疇敢捉此邦慕且思彼都或
弗覺我聞父老言土俗見淳朴誰謂三代遙直道久彫斲
昔歲宰嶺南茂績已犖犖安能效俗吏蠅營甘齷齪持此
惠元元庶幾回否剝上不負家傳下不負所學

近代宦遊人見客惟長吁誰肯艱難際談笑慰泥塗仲冬
入官署肅肅歲云徂天寒花影寂吏散鶴聲孤反喜親故

來晨夕相與俱假我以燕見飲我以醞酬酬酢逮夜分縱

談無所拘夙聞卓魯聲所見良不誣寧使甑生塵弗受非

義汗人龍遠趨庭圖史但足娛

時表弟臨公
來省署中

僮僕那得飽

麥飯不滿盂感此冰檠操古道闢榛蕪館粲願已足安忍

覬微需殘臘入新年且復畱斯須明發驅車去高義永不

渝

將之濟州畱別陶丘諸子

仲冬風雪天驅車來潁亳渡河憩陶丘親故欣有託豈謂

此邦人好義重然諾大雅久凋零李

大來張

龍弼

最雄博

晤言日靡虛唱和間酬酢餘子皆人豪殷勤慰蕭索投分

見平生茲遊殊不惡故人忽見招相顧咸驚愕高歌賦繫
維長筵引杯酌碑版分縹緗書畫填囊橐執手訂後期祖
送盈東郭念此真摯情欲行還復却苟非鄒魯遺焉能挽
鄙薄曹州足牡丹李家孟一有芍藥穀雨及花時重與諸
君約

酬楊聖企

吾友禽山子結交徧海內濟上圻三楊仲子尤稱最及我
來油幕出入官府礙南池但一遊酒樓不再酌雖有風雨
情無由遂高會仲宣志依劉子猷缺訪戴咫尺失向賢到
今有餘悔何意朔風吹容我憩塵蓋得上君子堂杯酒定
傾蓋風流嗣昔人唱酬自我輩顧惟衰朽姿頭顱愧相對
吾子復豁達投贈託縞帶謬賞詞賦雄相期流俗外語及
遇合間千載同一慨所嗟會面稀驅車指海岱託契旣已
深嗟別夫何害

方雪疇招同姜瑞若李夔菴吳素夫郭振九過集寓
齋兼邀女郎浴蘭侑觴限蘭字

羈縻不自適結伴恣盤桓之子冰雪姿豁達披心肝嗜酒
露天真論詩感泣瀾召我二三友旅館具盤餐肴核鮮凡
撰鼎彝多異觀復恐酬唱寡蕭瑟不成懽聞有青樓倡來
遊目邯鄲細馬疾迎致當階下雕鞍罩頭去輕紗其入澤

如蘭自言昨朝至霜天風甚寒繞髻無釵鈿淡妝却羅紈
勸酬未及終清歌一再彈座客誰最密知音良獨難返照
入綺席洗盞興未殘故人忽見招愁來莽無端竝轡借吳
郎言歸夜已闌

方蛟峰以馬迎素夫與
予入署素夫遂爾歎約

選伎得若人庸非

吳彩鸞如何反遜謝展轉歸潘安錦纏雖不惜菱花祇獨
看會迎阿妹來雙倚碧闌干

浴蘭有
妹

孟百聚招同吳素夫錢德豈方處厚遊于青岳園亭

時女郎浴蘭在坐限趣字

江南花已殘河北藥方露春至各有時何必惜遲暮任城
兵燹餘勝遊少園圃除却南池花萍蹤罕一過于門世德

淡遺澤存嘉樹館甥乃名流久在金陵住相與惜春光苦
憶南中趣攜手出西郊芳園理閒步綠訝柳陰濃紅指桃
花聚故鄉久未歸莫辨入門路登堂揖主人繞砌花無數
青翠自虬盤緋紫莽回互猶憐舊題識苔斑蝕粉堊此中
足絲竹况有流鶯度清歌往復迴喁喁欲誰訴寒飈捲殘
陽美人色微怖四座各言歸吾亦醉欲仆好花不再妍恐
遭風雨妒重與園林別一步一回顧遙遙煙靄中茲遊那
可屢

贈馮子淵總戎

江楚壤相接皖口乃咽喉海門旣東指湘漢亦西浮自公

鎮荆南扼險控上游揮羽續皆挾飲至醪爭投遂令湖南
北鞏固如金甌豈惟奠三楚吳越亦安流公本相門子談
笑覓封侯倚馬草露布吮墨磨盾頭主眷倚于城勲業銘
鼎卣安得乘虎節來作江南遊水犀明組練甲帳擁貔貅
座上客如雲未坐彈吳鈞

昔我大王父會上平津閣繼起觀察公孔李淡相託兩世
愜情親一語敦然諾衰門福澤微後先歸冥漠餘裔復幾
人晨星半落落我友阮元瑜近入青油幕述公訊世交感
歎猶如昨遂忘蓬華姿彩鷁登苾屨握手話行踪問年心
已作漫勞元戎隊駐馬慰飄泊卽次生光輝候門慚簡略

再拜前致辭古道如可作

壽張鹿園先生偕太夫人六十

太倉張觀文
之尊人也

遙遙吳門山湛湛婁江水中抱璞人睇笑煙霞裏家世
本朱門生長鳴珂里詩書卽弓裘弗受塵冕滓植躬若圭
璋澄心如蘭芷復賴偕隱儔椎布薄華綺清河盛冠蓋高
陽富金紫翁志固弗移母德亦相似欣然却安蒲高蹈等
敝屣不見覽揆辰雙星耀江汜田田荷葉圓馥馥叢桂藥
蓮以表芬潔桂以况芳美年年當此時名園設筵几翁前
阿母隨花輿一何駛問翁何所懽問母何所喜玉樹繞庭
階膝前多令子

令子夫如何門庭師友俱如馬有驂驪如鳳有鷄雛伯也
操日旦津梁徧寰區贈綯滿交遊投贄羅生徒著撰已等
身丹黃猶弗渝一朝懸國門千金走通都叔仲復聯翩攜
藻皆名儒季子偶著鞭一鶚已前驅文采佇四映一一登
天衢所以四方士臨文想道腴必問諸昆季齒髮幾相殊
再問堂上親高年健飯無卽此可養志毋爲勢位拘長筵
一再舉鶴髮雙杖扶釐祝紛致詞清言勝笙竽優哉復遊
哉百年良足娛

重九後十日同方還山李石逋許綏人李芥須張如
三夢敦遊九松分得闕字

風雨戀重陽茲晨喜晴豁策杖甫出城頓覺心眼濶西北
多名山遠近青一抹玉屏尤當戶濃翠曉如潑九松誰家
地虬枝莽轆轤孝思所結轆本實全未撥謂鄧顛厓也諸子尋

真源捫蘿興難遏吾自愛吾松坐聽濤聲聒田家歲薄収
繩縛門無闔慰勞語未終且復飽粗糲瓦盆盛新筍雙螯
雜芳辣隨意取微醺悠悠想懷葛隔岸望前岑所思空木
末諸子欲遊玉屏不果移尊向溪邊細泉流活活近水草餘青將霜

葉微脫忽憶去年秋送秋情怛我輩鹿豕羣吟詩足生
活豈謂金閨人亦復同予達謂夢敦也勝遊良未闌苦被夕陽
奪高齋夜有花幽香猶可掇

壽方氏妹四十

伊予甫十一吾妹始懸悅二人富春秋豈作少女計妹年
纔十齡吾翁遽即世兄姊四五人惟妹稱女弟從此歷艱
虞慈母憂不細避亂走江東轉徙兵荒際生計且不贍何
暇問歸妻及笄返故園擇對乃佳壻猶記宅西偏方子初
入贅華燈照流黃兩家諧伉儷荆釵亦可前竹筍寧嫌敝
可憐謝家女最小尤明慧同牢曾幾時玄室倏云閉憔悴
未亡人無心紀年歲茲辰是何辰空房獨流涕

流涕念所天床頭執手託別去已七年音容猶如昨當其
結褵初期許殊不薄新婚甫浹旬千里赴然諾談經奪席

茵草檄傾帷幕耦試諸生間才華森噴薄鄉里算名流輒
推予與若卽在大江南時賢亦斂却吾妹實佐之雞鳴先
踴躍賣賦贏金錢稍稍潤囊橐誰知中壺人舉案惟藜藿

一朝嬰疾病刲股氣蕭索

方子疾且革
妹刲股療之

慷慨賦靡他矢志

酬冥冥門戶雖足待飽歷孤孀虐生者信無慚歿者猶可
作不見畫梁間雙雛已不弱

雙雛雖不弱撫摩良獨難饑時教飲啄飽時刷羽翰辛勤
二十年養成鳳與鸞大男隸博士咄咄登文壇次男亦蜚

聲落筆生波瀾晨夕讀父書遺文金石刊

方子遺詩數卷
妹爲鐫板行之

田廬旣苟足婚娶亦粗完兩婦名家女亭亭雙琅玕堂上

捧巾櫛堂下進盤餐果茹佇飴孫軒砌見芝蘭笑笑一巾
悵中外俱改觀持此報夫子心力亦已燁願妹進一觴勉
爲兒婦懽翟弗與文軒有日出大官壽耆方未央無爲苦
悲酸

悼亡妻方氏用安仁韻

旅食阻京華日月屢改易家書非不稠苦被關山隔入門
見素幃啼號已無益我無朝命榮胡爲此行役不待秋風
來房帷已寂歷梁餘燕啁泥榻有鼠行跡聞爾病劇中宛
轉扶牆壁凭立氣稍蘇假寐心轉惕紙窗背燈光猶疑孤
影隻相距僅浹旬死生蚤分析欲哭防母知吞聲淚暗滴

寒宵手上絲牀頭猶委積誰謂鼓與鐘他人恣考擊

作客半年餘辛苦累萬端方期秋暮歸與子語夜闌豈知
入我室人亡影已單上憂老母饑下念稚子寒稚子共我
宿秋月方臃朧夜半呼阿孃不知床篔簹空燈花落殘燼簾
幙生悲風思極都無夢何由見爾容爾容應憔悴疾患攻
心胸轉憶未病前尋思思不起惟有出門言琅琅貫子耳
君意自纏綿吾豈猿薄子同穴指皦日遙遙踰二紀王駿

洵可師龐參良足鄙

王駿漢人妻
歿誓不繼娶

盡室皆宛然獨長逝奪我閨中友真宰一何厲婺曜
斂光芒白日莽昏翳不知磨蝎宮今歲是何歲非無達者

觀淚出不能制朝亦嚙淚奠暮亦嚙淚祭子淚有時枯子
心悲無盡援理意暫寬觸境緒旋引他人強慰藉安識子
憂愍歸家曾幾時木葉衰還隕木落有再春琴斷無完軫
粉版題虛位舉筆吾何忍舉筆不能下空堂獨躊躇霜華
被階祀燈影暗庭隅悲風動丹旒得非覓返無靈馭日以
遠焉得有回車撫几一長號涕淚霑餒餘

悼亡述懷

結襦三十載禮法飭厥躬雖免飢與寒家殖故不豐賴君
甘淡素操作事女紅兼喜身力健從無疾病攻如桓依鮑
宜如曜得梁鴻相期到白首長此安困窮奈何去年秋無
端構閔凶曉夜不成寐氣喘心怔忡迨予山左歸病勢益
洶洶獻歲賦北征送我出房櫳其意慘以戚嚙淚對春風
豈知成歿別一去不再逢

計偕上公車仕宦趨紫宸茫茫燕市中強半肉食人我獨
何爲者投老遊成均出門難爲別欲去復逡巡亮無歿
忠命運偶遭迤邐私心懷隱慮逢人輒咨詢家書雜沓來所
傳多不真最晚知病篤冒暑還江津蚤暮成憂疑腸轉如
車輪京師至山縣稅駕方浹旬歸程非不速訣別竟無因
天乎我何辜血淚徒霑巾

歿生豈有數遲速無爽曷君歿我始歸相去半月爾彼蒼

何不仁胡不少姑俟驅君赴夜臺輒先半月歿又不先半月令我蚤歸里巧使不得訣顛倒是何理聞爾病瀕危痛哭呼已矣爾恨未別我便入黃泉裏亦猶我思爾恨不蚤至止我恨猶可言爾恨訴誰是賫志向重壤哽咽無窮已庶幾乘夢來絮語入吾耳

壽吳母盛孺人

吳久可之夫人也

延陵多女宗禮法兼鍾郝吾母實挺生內則嫺大略豈惟女德賢婦順亦相若累葉襲清芬彤管盛著作曰惟太夫人嗣徽增丹雘夫人本名媛珩瑤飭帷幕及笄乃執饋裙布猶且著上事廷尉公升堂慎唯諾于門澤旣深何妨亦

羅雀履滿旣不處儉復能約我讀逸園詩煙雲互噴薄不有壺助良誰與偕丘貉令子鬱瑰姿文章彷彿臺閣賈誼賦入秦陸機傳入洛高秋啓長筵麟脯間桑落我欲拜古几陳詩叶鞞籥遙望鍾阜雲風利不得泊何當歌永言一逐南飛鶴

寄方中諭學博

疇昔結交初意氣凌秋旻雅志在千古匪徒榮一身之子抱瑰姿冥討無儔倫廷對冠羣彥臯比坐華茵一探茅山曲再溯淮水津扇篔簹競相推如覩鳳與麟寄我瑤函篇文采轉鮮新餘興及吟咏鏗鏘奏韶鈞長跼讀未終香艷生

喉脣君本濟川才
屈首拖儒紳
試觀扶風帳
淮海多俊人
經筵方宏開
不愧爲師賓
因風寫我衷
勿嫌首宿貧
鋒車
行趣裝誰者
秉國均

仁標娶婦彌月作此勗之

季冬歲云邁
遠歸乃戒裝
載馳十五日
飽餐雪與霜
冉冉月旣望
解鞍升我堂
豈不憚行役
起居每不遑
諏日迎新婦
先期治酒漿
汝母旣辭帷
汝兄又斷行
汝少復不諳
百兩誰與將
汝今已有室
琴瑟諧清商
當念風雪中
阿翁摧

中腸

娶婦已一月
欲言復踟躇
念我結髮人
病篤猶長吁
思與

新婦見此志
迄未舒
豈知告廟時
始已三載無
自我失汝
母生計日以疎
衣裳皆散盡
珠翠無復餘
夫秋始納幣
皆予手拮据
婚嫁匪父母
疇與助微需
嗟予衰且老
一身兼舅姑
承歡非所望
無忘母氏劬

新婦未歸時
聞其端且靜
喜今初入門
家人咸慶幸
言笑旣簡默
珩璜復修整
懸知厚福人
獲報必弘永
所貴事夫子
雖鳴常戒傲
婦德尚柔順
不在才名騁
婦容尚端莊
不在紅妝靚
孝友與媯睦
內外同一境
侶隨必相規
晨夜須知警
持此爲家訓
觸目發深省

人生家庭中
莫如兄弟久
次則惟夫妻
百年常相守
古今

盛德人多男復多壽曾玄繞膝前夫妻雙白首來日知方
長慎勿暱箕帚願兒爲佳兒願婦爲佳婦鴻案恒如賓生
男皆耆耇熊夢定有徵鳳卜良非偶不見周南篇螽斯九
十九

戴予翼招同李石逋吳遣齋戴令及江四友張如三
集似古山房次遣齋先生韻

出郭豁煩襟青翠列屏嶂嶺疊雲逾深瞬息失背向幽人
臥東山高尚領玄貺招我同心侶如遊羲皇上密蔭覆簷
阿微颺滌塵埃稍窺山半亭飛泉時澗澆雨後萬壑來奔
瀉聲彌壯石廊疑天成鬼斧渺難狀平生耽幽棲茲焉快
疎放搔首向青天乾坤容俯仰延陵老詞客芳醕激清唱
言歸眺平楚出谷野方曠遠峰澄夕陰亭亭猶在望眷言
河朔會欲別轉怊悵回首山中人雲物何駘蕩

飲酒

蚤夏氣蒸濕連陰迷遠天刈麥甫登場插禾徧中田蠶女
提筐歸午夜不成眠伊予獨何事嚼觴涼風前微雨灑苔
砌好鳥鳴樹巔有酒不取醉夏日長如年借問酒中趣此
意誰能宣

自我喪嘉耦觸目淚漣漉老親缺甘毳穉子失扶攜復恐
酒與食無人爲庀治賴此室中伴黽勉潔盤匱殘臘營糟

丘足供一歲資上奉老母養下恤穉子飢舉杯忽長嘆往
者焉可追濁醪有妙理斯言不吾欺

舉世趨險譎吾獨任吾真豈不愛榮膺或恐失其身問年
衰已至宦遊等飄塵不如守田園日與骨肉親弱孫繞膝
前顛倒衣與巾此樂良足娛陶然飲我醇時事勿復道自
有社稷臣

苦雨行

正月雪苦多二月雨復密三月過強半十日晴無一合計
九十春雨雪居什七早秧不出針遲秧爛在室農人相告
語歲事安可必誰謂春雨膏農喜行人疾我性本懶拙畏
溼不敢出但慮北征兒少小未離膝一朝涉長途饑寒定
誰恤促坐擁地爐猶覺寒慄慄况爾征途中風急雨蕭瑟
須記此何晨立夏前十日

寄幼兒仁樾入贅京邸

古人重婚姻親迎乃爲貴入贅亦偶爾嘉禮固無二方春
甫納徵憐汝齒猶穉生長十五年何曾百里離一朝涉長
途徧歷關山瘁泥淖沒車輪羽檄飛驛騎驅馬出東門未
行心先悸念汝遠就婚家人黯含淚阿母不及送形容汝
應記阿翁送汝行臨河發長喟登車各愴神還家轉酸鼻
老親亦涕零茲行何造次自此懷抱間百憂縈夢寐心逐

馬蹄馳淚共雨絲漬冉冉征途中一月到猶未望斷薊門
鴻忽報雙魚至知汝到京日歡聲舉家沸又聞汝婦翁卜
吉期已遲客從長安來探出懷中刺喜汝忽長成稱汝果
瓌異開函未及終展轉予增愧汝婦壺範嫻四德知必備
汝昔在家日頗盛自標置今茲方有室勿墮平生志京兆
工畫眉東萊作博議妝臺傍筆床芳躅定誰企署靜好論
文晝長堪學字當入萬卷樓經史貯腹笥下物非不多斗
酒莫輕醉須令婦翁心常似初來意我友張太史侍從趨
中秘王母外家親故人猶子義問難倘過從古義豈遐棄
慈仁幾樹松西山數峰翠講肄有餘勤結伴亦把臂

謂姚
庠若

張尚
臣也但當一登臨未可太縱恣我老生計拙長夏北窗睡
常防收責人兼畏催科吏閉戶簡應酬祇弄雙孫戲婚嫁
雖粗完五嶽何時遂早暮過書堂汝兄一人侍少汝讀書
聲久冷同牀被以此倍思汝衰鬢添憔悴晨起老眼昏何
處望幽冀家書但數行倚閭亦差慰新婦初入門百兩競
迎致老屋僅數椽修葺良不易執豕厨門東酒食匪細事
歸期早雁傳莫待折梅寄回首白雲飛有人念予季

喜鄧樸菴見訪

先生海鶴姿賦質本清粹比年復善病屏居謝人事陳車
不出門謝屐常造次每登先生堂提命如誣諉下交荷忘

年入林敢把臂經旬未相訪前日偶省視傳語頭日間掉
眩喜鼾睡私衷蓄憂疑永夜不成寐薰風生微涼籃輿忽
過肆亟歸告家人鄧先生且至喜躍真踰涯披衣出趨侍
細觀別後顏形容轉益晬君家多壽耆皇祖稱人瑞堂上
太夫人九十又踰四君性最恬淡一切空諸嗜願珍百年
身常作斑斕戲茗椀稍淹留盼盼夕陽墜有轄不敢投清
躬恐勞瘁執手送出門慙慙不忍置顧謂陳子曰後會須
共記繡閣亞梅花爲我揚一鱗

東門小街行

山城昔被寇兵火十年餘彈丸雖苟存四郊皆空虛賊來
先東郊舉火燒民廬登城望小街忍淚但歔歔自從賊滅
後民力幸少舒誅茅蓋草店甃瓦被井閭前堂接商旅後
圃藝瓜蔬稍復舊時觀漸有升斗儲非無客兵過索犒不
停車獻歲忽晝驚驛騎馳羽書多壘雖辰沅安堵尚荆舒
大吏捍疆場未雨籌衣袂朝聞夕拜疏請兵敢躊躇軍符
日數至府帖辦糧糈芻豆勤飛輓丁男輟犁耨徵調徧匠
作搜括到雞豬豈知兵到日仍似賊來初淫掠肯多讓焚
殺亦相如可憐小街上壁穿門亦除馬矢與戶齊有屋無
人居生聚三十載一旦成丘墟作詩陳艱難敢告諸里胥

兵來行

兵來兵又來羽檄去如織都統甫將軍章京又彌勒前隊
未安插已報後軍逼椎牛復醜酒長吏自供億胡爲苦父
老所過生荆棘望塵先竄逃屏氣草間匿婦女聞兵來跟
蹌襪不拭但求生入城一步一顛踣遠有臨媿婦生兒城
圍側展轉風雪中面目無人色老翁願守家那無酒與食
縛翁脫其袴撈掠其筋肋殺犢十三頭流血成溝洫老翁
抵死求釋縛安可得前邨聞殺人夜半鬼火黑寄聲喚老
翁兵威不可測棄家人城來猶得保喘息嗟我請兵心本
爲疆圉飭豈知豺虎羣荼毒至此極徒飽鹵掠威誰資捍
衛力

憩小楓樹

出城三十里繁暑聊稅駕最愛此楓林趺坐濃陰下蟠屈
根如樛磅礴草可藉嘗讀我友記方舒來風木悲凋謝雪壓
虬龍晨月飾荇藻夜疾風吼怒濤返照逗微罅此景時在
懷流連無冬夏竭來倚崇柯片晷容休暇涼颺拂襟袖叢
蔭接桑柘因知仁孝思觸物增感詫我家木山傍松楸託
隣舍烟火雖不遙漁艇隔湖汊微雨自南來樹根難久借
呼僕且驅車前村觀我稼

方子晦以李空同集見還計借去三十年矣感而有
作并東馬勲公

昔我舊京還手購空同詩愛其詩筆健把翫不暫離兔河
有方子借去攻詩詞自此年復年遙遙無還期我復遊白
下善價重購之棄置不復道往者何可追今年輯詩傳梓
里張壇墳因憶過江集諸子曷忍遺豈知此詩卷亦爲方
子私百里走一介欸欸前致辭許以十日後李集仍見貽
過江則已矣携去知爲誰令弟告以故或可慰吾思令弟舒來
於案頭携歸 屆期李集至再拜雙手持裝潢頗剝落卷帙
亦離披尚有圖與記標識還參差人生無百歲秉燭年已
衰那堪所愛書一借三十暮展轉几案間繙閱增吁嘻尚
嫌過江集不得還董帷譬如羊與求久別在天涯又如樊

與素判去已多時一朝還其一喜轉一悲作詩謝方子

兼告馬白眉

謂孔璋子勲公

最癡惟借書還書豈爲癡

昔人云借書一癡還

書一癡龔山云一甌也作癡非

仲夏鄧樸菴招同吳無齋陳問齋兩先生午飯畢步

北郊孫氏園看竹歸偕蔣潛伯暨漢思東巖夜飲

次無齋韻

有叟來山城信處還信宿

謂無齋先生也

親知競繫維未許歸鞭

速脫粟赴故人懷舊一何沃八簋將毋多飯罷各捫腹步

出城北門攜手遵河澳隔岸誰家園新笋初成竹巉巖列

嶂屏急潦奔碑兀遂躡略約過入林展心目恰喜園主人

乃是君隣曲

孫與鄧比隣

一徑逗涼風千竿挺寒玉禪房席未

溫相與披書幄芍藥紅已殘梅子青未熟雜坐濃陰中穉

子衣猶復因思趙中丞疇昔此休沐

舊為中丞柱野公瓠園

園林卜

畝寬錦繡萬花簇俯視川原間一望鋪平綠世代有升沉

人事分涼燠不見鷄林莊亦復他人屬茗談遂移時何必

杯中醪吾聞舊山中

無齋自號舊山隱者居白雲巖

巖洞幽且穆抱膝白

雲顛君身有仙骨胡為舍煙霞亦愛凡草木應念舊雨深

禮法罕拘束九老與耆英名存人已沒兩叟七十餘

樸菴七十

五無齋

陳子亦踰六

問齋六十三

獨予齒差少花甲猶未足

予五

十猥叨忘年交結伴探巖谷坐久憺忘歸返照西山促重

登君子堂洗盞繼以燭高情如未厭良會猶可續輕颺動

前簷欲別還躑躅落落二三子瀕行再諄囑蘭亭和羲之

石鼎聯師服賦詩人一章君諾吾亦欲

壽張如三姑丈五十初度次令弟敦復宮諭韻

勺園好亭榭四時饒花枝竹樹吳小仙山水黃大癡牡丹

十二欄楊柳九曲池良辰美景備朋好競追隨之子居其

間如坐菴水涯永懷委時運任真無嶮巖城市宛山林清

福天所私憶昔識君初坦腹方佩觿秦淮花月佳文酒與

棲遲焱風一朝至吹返舊茅茨丁年各壯盛不敢狎羣嬉

結隊執槃敦文采紛陸離獻策比江都賦詩凌陳思人情

多翻覆世路飽傾歎令弟拔蝥弧揮手謝東籬協亢本齊
名乘韋乃先之猶記鳩茲擢目送仙舟移高門列丹戟宮
袍拜形墀自顧惜流年益增壯志悲君獨治園亭不顧時
俗嗤門開三徑曲樓聳百尺危翻笑老兜整耿耿嘆數奇
子如耕下溟吾亦燒東菑桑柘接衡宇桔槔流清漪引鏡
照容顏都非少壯時老嫗不自量猶欲綳嬰兒拂衣遊薊
門送我臨路岐雖上春明書但霑京洛緇何若隆中人且
與林泉期疇昔所著書名已菀苑馳我歸成老醜鬢鬢霜
有髭舍旃圖千秋安能駐奔曦自謀適不臧羨君亦奚爲
逝將結末契擺落塵務羈所嗟室中友同失屣屢炊君有
好明珠髻鬣愛文詞定知備梁棟寧止充耘耔仙果海上
來鵝雛更莫疑試觀眉目間矯矯非常儀信知丹穴內必
產鸞鳳姿仲夏日初長園居良足怡臘酒浮春甕新茶傾
縹瓷坐臥綠陰中侑以新黃鸝朝呼竹林友暮和松陵詩
令弟工五字遠寄絕妙辭想見鑿坡暇珥筆咏重熙薰風
動虞絃殿閣彈桐絲嗟我衰老餘拜祝何所貽載和鵝鴒
篇爲君勸滿卮百歲勺園中風雅賴總持

上元後一日張如三招同陳默公劉爾雅趙以贊左
子周孫喈公勺園看梅限黃昏二字

浮雲蔽東北白日復西藏薄寒尚中人烟雨闕羣芳愛此

池上閣俯睇花成行紅英間萼綠欲開猶含香有酒酌復
斟檐隙發奇光天暗花轉明燈火徒蒼茫對此不成醉歲
月安可常不見隄邊柳柔條颺微黃

歸鳥棲庭柯吾亦憺忘言山雨暗遙岫翻愛天宇昏朦朧
月光中花氣相吐吞匪無桃李艷但覺肅心寬清懽人所
忌剝啄誰到門同志二三子尚嫌城市喧期我花前酌載
舉山中尊高會良獨難茲游焉可緩

輓瀟山王爾玉先生

諱振基學博止
泓之尊公也

瀟岳有高士立德富春秋振衣天柱巔濯足皖水流弱齡
揆文藻矢志恣冥控有弟雖登朝謂大中丞
石雲公鉛槧弗少

祭酒縫掖聞名高位不酬一朝遘陽九萬事同雲浮寒擅
方需次巢父已掉頭圖史滿四壁詩書爲弓裘閒撫無絃
琴其聲清且幽席豐志常淡履約道彌修孝德冠里閭任
卹徧交遊樹惇如彥方植躬比太丘世人逐腥羶疇足回
君眸凶問一旦至春杵輟隣謳愧無磨鏡具酌酒拜松楸
時至復何戀憺焉與天游鴻翮翔高旻凡鳥何啁啾

遊浮山用東坡佛迹巖韻呈山足上人

上人無大師
之高足也

巨靈闢混沌蓬壺借一股大塊厭肥重浮漚輕如羽側足
躡山椒心目互吞吐雕鏤神若助奇譎天可補金谷轉青

鸞金谷巖有青
鳥他山罕見

滴珠

巖名

垂香乳紫霞

關名

插霄漢鼇脊

水居集七
琢鬼斧磴轉失前峯會聖

巖名

真佛土宛轉浩笑廊嵌空

虬龍舞或偃身入甕或布踵接武蒼茫烟海中九華露一

拇屯霧脚底雲飛泉頂上雨憶昔神廟時琅函振法鼓

萬曆

中賜藏慈聖太后賜紫衣

潘潘復蠲金紺宮比洞府至今存銀牘無復

燕金虎疇昔禪誦場公然樵牧侮密箐裊深林白晝伏弓

弩歐遠跡已陳

遠錄禪師與歐陽公因基說法處

黑白今誰賭開士豫章

秀卓錫良有取我獨伐幽奇欲爲松菊主安得挈家人于

焉學農圃

水居集卷之八

七言古一

贈別吳子遠先生公車北上

古者三年一選士其在成周爲賓興沿迄炎漢至唐宋昭
代因之法倍增國初已來無定額進士多者四五百布衣
韋帶識聖顏但得一命皆恩澤當時進士非不尊所貴羔
雁無私門如今科目嚴且隘每聞歐陽馬首喧先是言者
議罷止祖宗良法幾如屣我觀先朝賢公卿竹帛勳名多
繇此南宮之役當明年計偕車馬何翩翩桐子延陵實世
胄一時就道三着鞭方今天子坐宣室拜揚稱旨如膠

漆我公年少志澄清帝京聲價無其匹閉戶著書海內知
大者河嶽小珠璣孝廉二字誰不媿如公經術洵過之憶
昔庚辰霜蹄蹶主者空迷日五色公幸不入其網羅今爲
九方之駿物小子初生髮未齊朝夕倚公與提携公年三
十我二十才望何曾似鎮西願公明光先起草石渠金馬
爲君掃陽元如有外家風他年趨侍長安道

公子外祖行也

臺城歌

君不見鷄鳴寺後是臺城古石短垣多斷裂荒藤縈蔓得
不傾有時天陰風怒號如聞弓刀戛擊聲相傳侯景謀不
軌佞佛之君歿於此當年塞北何曾清兵戈已自蕭牆起
嗚呼同泰寺已無雞鳴雞鳴胡爲乎祖宗建立特相傍分
明殷鑒堪嗟吁可憐生時茹齋素歿時泥水何穢汗從前
假歿便贖回一朝真歿滿朝金錢安在哉

結交行贈程葉二子

長干裘馬何翩躚皆言結交須少年少年醉舞珊瑚鞭日
暮齊登芙蓉船瑤琴寶瑟聲喧闐道傍觀之如神仙二子
閒居門晝閉結交已自兒童歲但期白首母相忘不信人
生有盟誓程子厚重多古風葉子沉靜將無同翹然聳身
百尺上俯瞰羣輩如螻蟻斗午夜氣常雙見知與不知都
稱羨我聞此間有異人比來卜隣得識面當今能詩之家

非不多誰爲沈宋誰陰何却愛潘生詩思好往往摘句向
人歌君歌我詩我拂塵啾啾瓦缶何堪數架上書籍比丘
林試爲君吟唐杜甫杜甫遺集至今傳兩人更讀不停編
我學其詩亦已久祇恨形似神未全少陵老友有高李我
亦登臺臨流呼二子有唐三賢實鑒之所不克終如此水
嗚呼富貴貧賤俱不驕意氣岸越凌雲霄卽今風波容易
起莫言舟子更招招君不見管華同學稱莫逆一事不投
遽割席又不見嵇康呂安困塵埃有時相思千里來

夏贊府歿難歌

諱統春
黃陂丞

春王正月賊犯楚黃陂士民棄城走遊騎入城已焚殺獨

見夏公嬰城守巷戰不勝遽就縛從容北嚮赴湯鑊強奴
故緩須臾歿朝夕置公於帷幕嗟乎賊亦慕聲名雖惡其
忠感其清公且隱忍狗鼠側血誠誓不與俱生辛苦賊中
凡三旬曾無一語相承應他人避歿歿不免如公求歿歿
不能先是賊僞立邑長挾公走荆索賚賞城中父老殺其
令賊乃轉戰無遺網十室十空鮮子黎更聞四出捕餘黨
公如父母看屠兒奮然罵賊何骯髒古來殺身只砍頭未
有割舌斷手抉咽喉次及心胸皆剖視屹如山立罵不休
方今廷議罷保舉吾鄉忠烈幾堪侔前有毅令後黃丞兩
賢義豈爲楚囚至今小西門外悲風起夜夜青燐環壁壘

妻兒空載骸骨歸賢良方正當如此嗚呼高牙大纛皆王
臣胡爲逃者降者相因循莫怪大臣不歿小臣歿歿乃無
負於天地與神人

勞勞柳歌送方子詒歸里

勞勞柳輕風拂地垂攀條折枝送君去聽我長歌古別離
身藏寶劍無人識手持璞璧誰不疑南州意氣百尺上鴻
飛冥冥何慕爲方今三豫成孤注鬼幽鬼燥相依附芳蘭
當戶都欲除蛾眉入宮合見妒君才百倍於時賢翱翔九
州不足顧遊梁詞賦跨前驅入洛聲名推獨步都門二月
春正妍孤帆夜泊芳洲烟生憎終南是捷徑却擬關門學

草玄男兒成名會須早不然一出便傾倒賦鵬終憐賈誼
才爲郎翻怪馮唐老知君努力待明時安能渙忍甘小艸
予亦從此戢隱鱗握手臨岐傷懷抱何以贈之瑋瑁簪又
何贈之綠綺琴琴以賡求凰之妙曲簪以銘斷金之同心
故園有發越謂東之木夫也少小成結髮朝望龍眠嶺頭雲暮眺
射蛟臺上月君雖在龍眠與蛟臺千里相思幾時歇

孤凰篇爲張邑侯太夫人賦

邑侯諱利民福閩人

君不見鸞凰之飛摩蒼天一日失雄墮平川中夜悲鳴無
伴侶哀哀遺雛相牽連雛羽短微雛力薄朝哺竹實暮桑
酪願言生長報所天無使鷹鳥肆搏攫漸看五象九苞成

奮翼翱翔何崢嶸西過崑崙濯弱水一鳴天下皆太平德
暉四海藹紛被見與不見皆稱瑞豈知丹穴哺伏時孤凰
引護之所致嗚呼士元已往鳳雛誰閩中張侯再見之張
侯少孤方襁褓太君十八守空帷清心直與玉同潔勁節
不隨霜俱滅挺然閩範多苦吟大家道韞堪比絜登堂教
子成大才複禪長被無嫌猜牛衣泣窮窮不送馬薦招客
客時來十年冰雪如一日無祿中道俱拋失以此郡邑不
上聞我侯悲憤淚橫溢壬午之夏飛鳧過巖邑瘡痍息兵
戈手持遺編不忍釋哭向諸生講蓼莪少小相依苦偏側
風不肯休樹無力一命服自斷機來五斗米從九膽得比
來江北無堅城還聞桐子絃誦聲共知捧檄安陽日猶奉
徵兵洗氏名吁嗟夫人衆母母生侯成侯爲桐守願侯早
晚侍承明銘之汗青傳不朽

短歌行贈王郎瞻文

王郎酒酣拔劍斫地歌且哀誰能識爾欽崎倜儻之奇才
布袍革履行市上半生坎壈困塵埃男兒致身苦不早貧
賤交游從來少翟公官罷可張羅况乃孤蓬棲枯槁世人
相面不相心祇緣壯士無黃金野鶴昂昂翔雲際毛羽且
復遜山禽君不見傅粉何郎身被戮洗馬看殺嗟何速郝
隆七日不曝衣知君錦繡在君腹

糶穀謠

客有自桐來者言桐事甚悉爲二謠以紀之

六月七月新穀賤遠屯山寨近屯縣城中官兵無儲糧道
傍觀之忌且羨將軍下令貸民間黃童白叟無歡顏維此
枵腹亦誠苦維彼剜肉豈不艱當時種田已一誤耗囊洗
橐爲孤注但求旨蓄能禦冬僥倖枝梧免逋賦喜今官吏
罷催征入門反復苦官兵殺雞烹彘延上坐瞋眸怒詈不
絕聲囚首哀辭乞垂聽前後只有車三乘已願盡沒濟軍
需尚備千錢爲私贈歸來作書與弟兄此後有穀莫入城
不如五石六石送商賈來春食盡歸黃土

乞食謠

髯參軍短主簿幕中賓客如奴虜蝦身蜜舌丐同盟飲醯
嘗糞不言苦舊識轅門禮數寬單衣白袷任盤桓排闥直
入無猜諱朝至卽饗暮卽餐醇酒肥牛歡未足更乞俳優
三兩曲歌聲纔發輒言佳喝采連聲無斷續酒罷更闌騎
馬回狂歌自比玉山摧沿街邏卒誰當道稱自前營左營
來一年三百六十宴中雜偏裨與屬掾但願老將長鎮桐
白首酣歌少征戰嗚呼志士常懷一飯恩出生入死走公
門且報繡衣行部至謁見何爲惜片言

蕪陰遇蕭尺木爲予畫扇書此以贈

龍眠山中有畫師我思前賢李伯時於今烽火間榛莽望
望浮山如見之浮山龍眠亘百里誰爲予圖此山水早泊
蕪關訪隱淪中有幽人蕭伯子伯子善畫更善文中歲不
第似劉蕡且復寄興丹青裏筆氣如烟墨如雲高高者山
蒼蒼者樹石橋滙其流茅屋環其路乃知世外無桃源只
在眼前觀去住

催科歎

仲冬風日何淒淒巷南巷北人晝啼可憐官家稅不足富
賣田莊貧賣妻城外田中生松樹人歿田荒何處訴生人
枉代歿人糧荒田苦納熟田賦鄉下老農負破囊白頭赤
脚號路傍昨聞十日復一比此身那得常在鄉一年田賦
有成案府帖畱中不得看官家已取什之二三長吏還欲徵
其半夜深苦寒復苦飢流霰滿天撲面飛堂下百人相向
泣猶待令君賞雪歸歸來鐵面鬚如戟按籍呼名施三尺
自分不得免鞭笞忍寒未敢前受責可憐杖下歿數人無
名無姓無六親夜闌令君方退食回首堦前鬼火新

臘日立春有感

今年人日春方至予時醉倒長安肆何期一歲再逢春眼
前滄桑市朝異憶在長安舊酒樓春盤春菜揚金鱗彩旛
錦障拂闌干四座風流間珠翠東郊大鼓迓春來幻作角

觚拖鈎戲百官魚貫擁緋輿花插貂蟬紅繫臂谷風流霰
乍晴曛青陽雲翹雜繁吹大官騶唱半籠街小官觀者亦
却避獨有貴戚侈豪遊玉盃金壘列姬侍雲樓綺席各相
望不數東方千餘騎此時獸炭沸羊羔江南主人方鼾睡
不聞閣下景陽鐘那知宮外銅駝淚景陽銅駝忽成灰漢
曆猶存王臘易歸來雖有探春情對此冠裳憂心醉塵沙
黯黯日無光悲風入骨如刀刺凍土作牛牛不肥牛前罨
耳芒神位黃頭青尾牛色殊青衣白繫循纏隊老農不解
按支干強占水旱誇其智市僧生涯好迎新還家競帖空
春字予亦呼童覓菜盤其如門外催租吏

歲晏行

歲云暮矣日月除今此不樂胡爲乎嘗恐樂極悲卽至私
家催負吏催租往歲人家餽酒肉今年除日相向哭荒田
插禾禾無科半飽將橐半馬腹縣官苛政復誅求賣田完
稅無人收爺娘妻子抱頭泣合家忍淚賣畊牛富家賣牛
牛價賤貧家無牛爲人佃隔年乞得千銅錢且賄吏胥免
赴縣赴縣入衙謁長官搶地呼天肉已剗怒詈鞭笞遭捶
辱依舊追呼不少寬城中稱貸如空谷哭向黃昏投店屋
不及江陵縣裏囚歲除猶得還家宿

憶昔行

元夜作

今夕何夕燈火無雨脚如麻流通衢却憶昔年此夜月清
光瀾漫臨宮闕是時天子坐內廷宮女踏歌聲不停五侯
七貴競入貢明珠錦照琉璃屏燈市燈樓價翔貴寶騎駢
闐如鼎沸問誰結綵據要津左爲丞相右太尉中有佳人
字莫愁袷服明粧獨倚樓烟火叢中足顏色一笑千人皆
舉頭市上珍奇復盈案古鼎名帖值百萬貴家自競賞鑒
殊手持贖物心何恨予亦租樓評事街肉如京坻酒如淮
寬裳一曲來空際紅粉雙雙落寶釵誰家樓閣紛相向鬪
火蹴毬各異狀中宵興罷輒言歸惟予漏盡神猶王已知
金吾夜禁寬呼朋禱蒲共盤桓酒渴黃柑傳欲盡醉踏長
虹望廣寒還家却向東方笑人生悲喜固難料今宵風雨
對孤燈誰把太乙青藜照

二月十九日生子

我父生我年十九我今廿八纔有後回首却憶十年前一
再生兒不解憐當時只道生兒早旦晚啼哭增煩惱荏苒
及今始探環翻悔少年何顛倒弱女今年已八齡雙手抱
弟到中庭老母焚香拜且祝我父門內又添丁如今哭聲
亦可喜雙瞳炯炯清如水幾番鄭重語山妻視之勿但如
阿姊

懷方爾止子畱

龍眠巨室推桂林文章節義世所欽國初沈淵有斷事節
義寥寥直至今爾止知止故不殆子畱畱身將有待嗟爾
兩人豈好名但求天下後世告無罪貢舉車馬何駢喧云
何携手去都門一家叔姪同心少萬古君臣大義存白露
爲霜西風急滿天鴻鴈秋翎溼念爾兩人立蘆中手持一
編歌且泣或云泣盡淚亦乾有詩慎勿與人看看者或悲
亦或忌恐有不測之波瀾君不見淵明集中無宋字億翁
心史守宋志其人無恙其書傳忠孝之名復何媿予亦雅
志在蕨薇其如孤子孀親情依依念爾兩人文行何峻潔
欲往從之時勢非却怪世人何太譎已則不能笑人拙月

落屋梁楓林青爾盍歸來話離別

爲張圯孺移家作

嘗怪古人好名義其事傳真亦傳僞同居九世若同心何
必連書百忍字童子尚不因人炊焉有寄人廡下事不如
獨居所全多且亦自明鴻鵠志君知公藝爲腐儒又知伯
鸞乃大噐歟典牛衣卜西隣手披荆莽良非易况復爾祖
故廬存墜茨丹塗益不墜自今欲訪茂先居依然策杖城
南肆知君先世家城南雖未充閭存此意君才自足大于
門眼前困約何足累南阮若自恥其貧豈與北阮居同地
且從竹林伴嗣宗昔人得一君得二

圯孺讀書子萬齋中
又與子亮望衡得二

步兵 予還舊巢亦有年所嗟湫漚如旅次安得結廬傍幽
人與君痛飲同姜被吁嗟乎祖宗櫛沐何艱難河山竟等
秋毛棄如君一椽一石念先人夷甫諸人能無愧

苦雨歎

山上雷聲喧山下雨翻盆風聲如潮雲晝黑蒼天慘戚無
顏色夜半雨猛屋盡穿兒號女詈不得眠披衣乞火厨無
烟水深泥濁到床前老妻擁被被裏裂但求天速明不怨
雨不絕忽憶几上數卷書暗裏摸索冷如鐵捲向床頭敝
簾中猶恐倉皇多損折何幸隔隣雞乍鳴嬌女倦欲卧嬌
兒無哭聲怪殺雨天不晴曙東方欲明猶未明強起抱薪
雙股慄溼薪翳火火不出却尋夜來漏處已成河雨勢纔
紆雷聲疾坐看簷溜滴不休抱兒挈女相對愁奈何庭鴨
喜多雨公然展翅堦下舞

投杼歎

曾參必非殺人人慈母不能明其假賢如曾參猶投杼何
况人在曾參下乃知來告參殺人此人卽是殺參者

後苦雨歎

陰雲肅肅風中來溼氣爲蟲爲莓苔晴天日影到不得何
况疾雨與狂雷狂雷疾雨兼風打鼠逐其羣破屋瓦夜半
中椽一竇穿屋脊之雨勢如瀉嘗時漏處亦不無所幸填

塞祇須臾奈何此竇不及備乃使環堵一室成具區披衣
下牀黑無火赤脚踏泥泥滑我依稀聽得雨聲微鼠復跳
號屋瓦墮可嘆雨休漏不休衣裳淋漓書飄浮雞鳴窗白
天欲曙尚聞啾啾唧唧繞牀頭吁嗟乎天有風雨人有室
或云天已連陰四十日鼠乎鼠乎爾信頑天晴爾無藏身
術爾不見桁衣嚙盡盎粟空三歲貫汝誰之功我今不愁
陰晴天難卜但求鼠莫穿我屋再祝天雨稻梁充爾腹

犀杯行

有持犀杯求直者云吾家故物也潘子見而傷之作
犀杯行

犀杯之產自海濱我欲求之渡無津有客來索十金費其
物雖真其直貴舉手謝客爾徒然我今尚負酒家錢有錢
且將多沽酒有酒何妨用瓦缶客復致詞此家琛君世傳
之比南金嗟爾客語何迂闊不賢合爲勢家奪祇今天下
重器須臾移區區此杯安足悲而况吾家故物被烏攫奚
啻千杯萬杯填溪壑客聞此言色大慚君猶如此我何堪
前車之覆後車戒回身急向富兒賣

憶昔行贈董子九

憶昔遨遊皖江濱范生壁上多煙雲訊之知爲先生作筆
瀾墨氣何氤氳先生中年厭苜蓿坐臥前賢紙數幅庭閒

祇有草如瓊門冷兼無人送菊竭來采勝投子山山深水
秀飽躋攀自非胸中有丘壑安得尋尺統素間山截業兮
水潺湲嗚呼官作廣文人所倨何況廣文官復去挾君之
畫與君才莫道天涯無坐處君不見仲舒對策真賢良老
大猶相膠西王

寄張鸞上

張子與予交最蚤其時黃生吳生未交好一自滄桑歸里
門兩生翻爲予傾倒今年秋入石頭城見君投刺知君名
要我至家酌醴醪幅幅烟雲觸手生君才百倍年方壯卽
看圖像雲臺上區區小技何足稱亦自逡巡謝未能爲言

對宇有施子其人沉深得盡理酒酣落筆不知多亦或五
日一山十日水又言阿叔更奇矯蟲卽真蟲鳥真鳥興闌
携我訪名園滿座滄洲青未了大阮小阮解琅玕示我兩
幅皆奇觀惜也邂逅別施子道遠安能生羽翰黃生爲予
索二妙得之當不減雲嶠君如不妒我貪婪早晚迫促遺
同調

方井公三十

羨君讀書萬卷餘不道無魚復無車夜然青藜天祿閣晝
揮玄草子雲居憶昔逢君金陵寺欽寄歷落如兒驥携手
春星論古懽回思已是十年事爾時祇道結交情豈知踰

歲定姻盟彥道雖然猶有妹太冲未免媿爲兄自此連床
共風雨見君才思爲君舞草聖不殊顏魯公詩史直窺杜
工部十年詞賦動江濱關西伯起從如雲挾策不得見天
子談經空逐諸生羣感君意氣摧天棧等閒躑躅梁王簡
結髮長懷古處心掉頭不顧時人眼君才本足成梁棟他
時定作明堂用驥子佇看舅不如牛衣况有人堪共勸君
對酒勿悲吁安車蒲輪無時無雲鴻自合騰霄漢神龍豈
應困泥塗君勿謂丈夫輒軻遂足恥我有一言令君喜彈
指明年復明年猶不失爲少進士

和陽王氏一門五烈歌

崇禎八年賊如蝟蔓施楚豫暨秦魏轉戰江北滁和間十
城九城無生氣爾時和陽隸陪京相距衣帶水盈盈不聞
樞府遺一矢不聞京營發一兵以故朝至夕隨破戰者披
靡守者情俘馘慘辱千萬人白骨如山滿城臥先是王氏
有盟言集女於廟婦于門賊至義勿受彼辱等死死當爲
貞竟未幾賊燧果危逼婦女求死不得各呼其夫夫爭
前拔刃刃長舉無力可憐一女四婦爭相持死同一刃復
同時或曰和爲豐沛地先皇風化猶未墜或曰王氏世青
箱傳家節義有餘芳嗚呼背君恩者食君祿滿眼庸庸皆
厚福豈無累世席簪纓一朝國破爲臣僕乃知巾幗之中

有丈夫寧死不受盜賊污若將世眼觀往事此一女四婦
何其愚君不見殺妻者夫殺姊者弟此婦此姊良獨難此
弟此夫亦不易信乎王氏多節義又不見河邨戴子爲傳
記十年之後遇滄桑亦能之歟矢靡二

送劉爾雅北上廷試

長安二月宮花香紛紛裘馬賦長楊爾獨何爲始俶裝言
脂其車自故鄉去年八月槐花黃素鞞纍纍守親喪一日
未除不忍忘吾寧雖伏弟子行此意纏綿良可傷天其或
者降之祥未幾下詔求賢良果然一出卽騰驤今日科名
等糝糠黃金百斛走文場藍公惡圓而爲方七十六人人

鸞鳳喜君出身自文章始進旣正安可量送送臨風意飛
揚萬里之行自此長竚看彩筆霏琳瑯射策王庭不可當
太學人文雖濟蹕有才如此胡徬徨男兒致身苟有常明
經進士誰低昂况君百倍少年郎千尺雲遶彈指翔黃金
臺上何輝光朝躡金門暮玉堂作詩贈君吾恐惶青雲青
山兩相望

揚家打虎歌

白麟山下虎相逐三三兩兩繞林谷未昏便伺路傍人將
曉猶攫籬籬邊犢行人到此輒逡巡我亦爲之停車輪忽逢
少年三五輩自云揚家打虎人不幸家隣猛虎窟長戈彊

弩時出沒更織獸皮爲網羅張羅置杙向叢樾殺虎本用
衛民生誰知翻以虎得名官家緣此著爲今年年打虎誤
春耕春來打虎限時刻頭限二限吏如織虎歿疾馳獻虎
皮少緩須臾坐隱匿且如今年新令來送官何愁無錢財
帖取虎皮月數下昨朝馬上使人催嗟我楊氏一何愚且
味除害適自貽其害却喜雲霧四山迷拚向深林張羅艾
我聞此言重興悲胡不毀網折弩扶畊犁楊家少年淚如
雨畏官何能復畏虎

重建滕王閣歌爲漕督蔡公賦

滕王閣何鬼峩遙瞻匡阜千峰翠俯瞰章江百尺波一從

帝子歌舞後朱簾畫棟竟如何桓桓蔡公信人傑特膺簡
命專鈇鉞謳吟已滿峴山碑風流更愛南樓月乃眷此閣
鼎新之一旦鳩工百執隨卽此知公無廢事諸所罷行皆
如斯閣成受簡良不易王勃有序韓有記閻公雅望烏足
倫中丞惠政洵無媿朝廷知公仁且賢詔督漕渠治海壖
把酒落成雖不暇勳名終與閣俱傳君不見新政已慰雲
霓渴興頽舉廢復如昨仁風甘雨徧東南奚止區區滕王
閣

皖上與馬永公望江有作

君不見岷山之源發江水逶迤奔折幾千里宜城城下瞰

大江滔滔天塹南國紀城中山坡高於城與君登山目縱
橫南望江州波浩淼東眺天門浪砰訇隔岸晴巒青可數
上下風帆疾如雨因思此地古戰場曾駐旌旗建樓櫓孫
郎年少起江東始克皖城何其雄可惜東南方起事不能
長驅收成功偉哉王師熾友諒海門風急秋濤漲再陷再
復扼咽喉揚帆始至荆襄上烟波寧謐曾幾時宸濠公然
來稱師嚮非張公楊公能歿守南昌雖破南京危吁嗟乎
乙酉之夏左師亂名則除奸實則叛城中焚僇萬餘家江
上殺人無邊岸由來此地據上游誰秉國鈞無遠謀與君
竚立歎復歎東流之水空悠悠

驪駒歌爲陳生賦

平生愛跨青絲騎家貧價重邈難致陳生本是權奇人年
少與予有同嗜自言有馬名烏騅迢迢遠自榆關至雙眼
懸珠黑似漆四蹄踏鐵疾如鷲等閒牽來不著鞍臙足毛
純光照地昨向貴人新買得貴人不重馬重利嗟彼位高
金且多賣馬公然等市肆何若君無擔石儲百金買馬十
金轡惜乎烏錐名不宜世人顧名鮮思義騅爲蒼白雜成
文細看此馬殊不類其色純黑其齒齊改曰驪駒庶無媿
驪駒驪駒聽我歌爾今得主良不易爾旣齒小足驅馳主
亦妙年饒遠志與主成功三十年陳生陳生人中驥

木棉行

舒城道上塵如烟大車小車載木棉更有驢羸及負擔一日之間過百千借問木棉來何處估客將舟走商豫裝向江南并江西賣與人家作衣絮繇來東南多轉輸飛芻輓粟無時無西北雖然少稼穡猶種此物佐寒需奈何不畊復不織空使腴田長荆棘嗟爾舒人亦何愚車載肩擔謀衣食

抵歸德寄呈母氏

暮見日入朝見出冉冉征途十二日卜夜不愁天意陰瞻雲但念慈幃疾人生豐約各有時乞食羞與鷄鶩匹何當歸飲桐陂水跪爲北堂理澁木

梁園行

梁園自古稱宋國白馬萋苴何愴惻千餘年後封梁王置酒平臺樂無極一時鄒枚諸儒生賦雪賦月才縱橫養士風微人競羨至今遂以梁園名又千餘年天寶末祿山無賴犯京洛睢陽食盡張許亡九原生氣猶可作我來此地吊前賢但聞梁園人爭傳幾回却詢張許事欲答不答心茫然世人重文輕節義動稱梁王能好士不傳張許傳鄒枚何怪人臣懷二志祇今鄒枚安在哉荒煙衰艸沒平臺不及二忠祠雖圯猶有春秋酒一杯

谿南草堂詩爲陳簡菴賦

先生名卿之子孫清白相傳裕後昆歸老林泉無長物都
諫所築惟東園皇皇參政踵芳躅妙氣爲齋枕堤曲十里
荷花雨後香千條柳色風前綠當時卜築傍南谿眉檐肩
堵足幽棲亂餘田圃成荆棘蒼蒼古木與雲齊草堂重構
復何意村花野水天然致先人本不愛繁華子孫寧更煩
塗墍我來黍丘特追尋登君草堂爲君吟詞客紛紛鋪美
勝心知雅非先生心自言地僻倚林麓劃粥茹藿媿幽獨
錦字朝乘秋雨揮玄經夜向春星讀平泉子孫愚且貧輕
將木石與他人何如草堂一片地食貧苦節伴松筠君不

見谿南詩文自怡悅草書兼欲稱三絕詞場梁苑未全墟

賴爾寒窗吟白雪

先生大父都諫公始築東園尊甫參政公有妙氣齋因卽其地爲谿南草堂

柳梢行

柳梢柳梢何填委家家場圃積如壘借問積此更何爲填
塞黃河工未已我聞黃河自天來汪洋澎湃幾千里遠從
積石導龍門其性奔決喜遷徙昔在先朝全盛時河防邊
備相依倚秋霖夏澇有疎虞大臣褫逐小臣死上衛泗陵
下親藩綢繆桑土無暇晷自從河決到荆隆三省哭聲酸
人耳不議疏濬議填塞千埽萬埽中流砥旣向鄉村責柳
梢復從城市搜麻臬官有本折工有餽胡爲民間浚膏髓

可憐一埽數千金河夫數百忙如蟻不幸湍激難拄撐數
百人隨埽落水奈何下埽復不固載沈載浮無根柢一朝
雨後漲河流金錢百萬洪波裏甚或懲噎委岸傍歲月糜
爛如敝屣其實塞河亦無難河塞官憂吏弗喜官吏以河
爲奇貨日日更番迎歌妓譬如崇禎諸鎮將剿賊翻畱賊
爲餌幸也皇天厭亂河自塞否則流毒伊胡底祇今河工
已告罷猶聞柳梢禁不止嗟爾農夫插柳時本期析薪炊
糠粃從此柳梢屬官家私剪私伐遭鞭箠採樵更防他盜
來悔不田間種荆杞

歲晏行

歲云暮矣役車休我今不歸何所求老親甘毳應未缺所
嗟先壠委荒丘桐城春冬重祭掃祀先不獨在家廟紙錢
上塚掛枯楊爆竹連山延野燒可憐遊子不得還朝朝有
夢到家山客中贏得三冬煖歲暮空偷十日閒願我來年
守稼穡葬祭以時供子職清明除日狐兔嗥跪呼墓前兒
在側

響馬歎

日日聽人說響馬山東河北徧原野黍丘東北尤長驅出
沒豐碭無時無我聞卯金赤帝子此邦乃其發祥里胡爲
至今聚逋逃殺人攫金如秋毫弓箭在腰刀在手過耳響

木匣集卷之八
箭聲如吼可憐宦遊多隄防所向剽掠惟客商暮聚村中
平明散男子受縛婦女爨響馬纔去趣報官官兵來時雞
犬完吁嗟響馬爾何酷仇此一方何時足近說響馬報漸
稀聞者不喜暗歔歔分明來去戒勿洩免教官兵復如櫛

木匣集卷之八終

